



PARLAMENTO
DE GALICIA



BOLETÍN OFICIAL DO
PARLAMENTO DE GALICIA

X legislatura
Número 417
23 de xaneiro de 2019

Fascículo 1



SUMARIO

1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

Admisión a trámite e apertura do prazo de presentación de emendas do Proxecto de lei de rehabilitación e de rexeneración e renovación urbanas de Galicia [140695](#)

1.3. Procedementos de control e impulso

1.3.6. Proposicións non de lei

1.3.6.2. Proposicións non de lei en Comisión

1.3.6.2.4. Proposicións tramitadas

COMISIÓN 7ª, AGRICULTURA, ALIMENTACIÓN, GANDARÍA E MONTES

Aprobación sen modificacións

40195 (10/PNC-003245)

Grupo Parlamentario Popular de Galicia

Blanco Paradelo, Moisés e seis deputados/as máis

Sobre as actuacións que debe levar a cabo a Xunta de Galicia respecto dos trámites administrativos que teñen que realizar os concellos en relación coa limpeza e conservación dos predios e faixas de protección dos núcleos de poboación, así como os traballos técnicos de redacción e elaboración dos planos que delimitarán esas faixas de protección [140690](#)

Aprobación por unanimidade con modificacións

41682 (10/PNC-003396)

Grupo Parlamentario do Bloque Nacionalista Galego

Rivas Cruz, José Luis e cinco deputados/as máis

Sobre as demandas que debe realizar o Goberno galego ao Goberno central en relación coa etiquetaxe do mel [140691](#)

Rexeitamento da iniciativa

36819 (10/PNC-002965)

Grupo Parlamentario dos Socialistas de Galicia

Fernández Fernández, Raúl e dous deputados/as máis

Sobre as actuacións que debe levar a cabo o Goberno galego en materia de prevención dos danos ocasionados polo lobo, así como a divulgación, o asesoramento e a investigación relacionada con esa especie [140691](#)

I 38763 (10/PNC-003102)**Grupo Parlamentario do Bloque Nacionalista Galego****Rivas Cruz, José Luis e cinco deputados/as máis**

Sobre as actuacións que debe levar a cabo a Consellería do Medio Rural en relación co uso das lamas procedentes da depuración, así como dos residuos de hidróxido de calcio procedentes do Principado de Asturias, como fertilizantes das terras de cultivo [140692](#)

I 41018 (10/PNC-003332)**Grupo Parlamentario de En Marea****Rodríguez Estévez, David e Sánchez García, Antón**

Sobre as demandas que debe realizar o Goberno galego ao Goberno central en relación coa oportunidade que supón para Galicia a nova política agraria común para o período 2021-2027 [140692](#)

I 41216 (10/PNC-003349)**Grupo Parlamentario de En Marea****Villares Naveira, Luis e dous deputados/as máis**

Sobre as actuacións que debe levar a cabo o Goberno galego en relación coas perdas que está a padecer o sector gandeiro a consecuencia dos ataques do lobo e doutros animais carnívoros [140692](#)

I 41855 (10/PNC-003410)**Grupo Parlamentario dos Socialistas de Galicia****Vilán Lorenzo, Patricia e dous deputados/as máis**

Sobre as actuacións da Xunta de Galicia en relación cos traballos que se están a levar a cabo no proceso de concentración parcelaria Meavía-Quintillán, no concello de Forcarei (Pontevedra) [140692](#)

1.5. Procedementos relativos a outras institucións e órganos**1.5.1. De ámbito autonómico galego****1.5.1.1. Valedor do Pobo****1.5.1.1.3. Resolucións do valedor do Pobo**

Resolución da valedora do pobo, do 21 de xaneiro de 2019, pola que se actualizan as contías por recoñecemento do grao I da carreira profesional horizontal do persoal ao servizo da institución do Valedor do Pobo [140693](#)

4. Informacións e correccións de erros**4.2. Correccións de erros**

Resolución da Oficialía Maior pola que se procede á corrección de erros na publicación, no *Boletín Oficial do Parlamento de Galicia* número 401, do 19 de decembro de 2018, do Acordo da Mesa do Parlamento de Galicia do 17 de decembro de 2018 polo que se aproban as Normas reguladoras do réxime retributivo na situación de incapacidade temporal do persoal ao servizo da Administración do Parlamento de Galicia [140694](#)

1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

A Mesa do Parlamento, na súa sesión do día 22 de xaneiro de 2019, adoptou o seguinte acordo:

Admisión a trámite e apertura do prazo de presentación de emendas

- 44223 (10/PL-000012)

Presidencia da Xunta de Galicia

Proxecto de lei de rehabilitación e de rexeneración e renovación urbanas de Galicia

Examinado o Proxecto de lei de rehabilitación e de rexeneración e renovación urbanas de Galicia e logo de verificar que reúne a documentación e os antecedentes previstos no artigo 111 do Regulamento, a Mesa, por unanimidade, acorda:

1º. Admitir a trámite o devandito proxecto de lei polo procedemento legislativo ordinario.

2º. Asignalo, oída a Xunta de Portavoces, na súa reunión do 22 de xaneiro de 2019, á Comisión 2ª, Ordenación Territorial, Obras Públicas, Medio Ambiente e Servizos, e ordenar a súa publicación no *Boletín Oficial do Parlamento de Galicia*.

3º. Abrir o prazo regulamentario de 15 días hábiles para a presentación de emendas, que comezará a contar a partir do día seguinte ao da publicación no *Boletín Oficial do Parlamento de Galicia*. O prazo remata o día 9 de febreiro de 2019, ás 13.00 horas.

Santiago de Compostela, 22 de xaneiro de 2019

Miguel Ángel Santalices Vieira

Presidente

1.3. Procedementos de control e impulso

1.3.6. Proposicións non de lei

1.3.6.2. Proposicións non de lei en Comisión

1.3.6.2.4. Proposicións tramitadas

COMISIÓN 7ª, AGRICULTURA, ALIMENTACIÓN, GANDARÍA E MONTES

A Comisión 7ª, Agricultura, Alimentación, Gandaría e Montes, na súa sesión do 22 de xaneiro de 2019, adoptou os seguintes acordos:

Aprobación sen modificacións

- 40195 (10/PNC-003245)

Grupo Parlamentario Popular de Galicia

Blanco Paradelo, Moisés e seis deputados/as máis

Sobre as actuacións que debe levar a cabo a Xunta de Galicia respecto dos trámites administrativos que teñen que realizar os concellos en relación coa limpeza e conservación dos predios e faixas de protección dos núcleos de poboación, así como os traballos técnicos de redacción e elaboración dos planos que delimitarán esas faixas de protección

BOPG nº 386, do 21.11.2018

Sométese a votación e resulta aprobada sen modificacións por 9 votos a favor, 0 votos en contra e 3 abstencións.

O texto aprobado é o seguinte:

«O Parlamento de Galicia insta a Xunta de Galicia a:

1. Impulsar os mecanismos necesarios para que os concellos de Galicia, especialmente os máis pequenos, poidan realizar axeitadamente todos os trámites administrativos que teñen que ver coa limpeza e conservación tanto dos predios como das faixas de protección.

2. Colaborar cos concellos galegos nos traballos técnicos de redacción e elaboración dos planos que delimitarán as faixas de protección nos diferentes núcleos de poboación.»

Aprobación por unanimidade con modificacións

- 41682 (10/PNC-003396)

Grupo Parlamentario do Bloque Nacionalista Galego

Rivas Cruz, José Luis e cinco deputados/as máis

Sobre as demandas que debe realizar o Goberno galego ao Goberno central en relación coa etiquetaxe do mel

BOPG nº 400, do 18.12.2018

Sométese a votación e resulta aprobada con modificacións respecto do texto orixinal, pola unanimidade dos 12 deputados e deputadas presentes.

O texto aprobado é o seguinte:

«O Parlamento galego insta a Xunta a trasladar ao Goberno do Estado o seguinte:

— Na etiquetaxe do mel indicaranse de forma obrigatoria o país de orixe do produto e as porcentaxes de mestura, no caso de que proceda de varios países.

— Indicarase tamén se se trata dun mel sometido a un proceso de quecemento por riba dos 45 °C.»

Rexeitamento da iniciativa

- 36819 (10/PNC-002965)

Grupo Parlamentario dos Socialistas de Galicia

Fernández Fernández, Raúl e dous deputados/as máis

Sobre as actuacións que debe levar a cabo o Goberno galego en materia de prevención dos danos ocasionados polo lobo, así como a divulgación, o asesoramento e a investigación relacionada con esa especie

BOPG nº 362, do 26.09.2018

Sométese a votación e resulta rexeitada por 5 votos a favor, 7 votos en contra e 0 abstencións.

- 38763 (10/PNC-003102)

Grupo Parlamentario do Bloque Nacionalista Galego

Rivas Cruz, José Luis e cinco deputados/as máis

Sobre as actuacións que debe levar a cabo a Consellería do Medio Rural en relación co uso das lamas procedentes da depuración, así como dos residuos de hidróxido de calcio procedentes do Principado de Asturias, como fertilizantes das terras de cultivo

BOPG nº 375, do 24.10.2018

Sométese a votación e resulta rexeitada por 5 votos a favor, 7 votos en contra e 0 abstencións.

- 41018 (10/PNC-003332)

Grupo Parlamentario de En Marea

Rodríguez Estévez, David e Sánchez García, Antón

Sobre as demandas que debe realizar o Goberno galego ao Goberno central en relación coa oportunidade que supón para Galicia a nova política agraria común para o período 2021-2027

BOPG nº 394, do 05.12.2018

Sométese a votación e resulta rexeitada por 3 votos a favor, 7 votos en contra e 2 abstencións.

- 41216 (10/PNC-003349)

Grupo Parlamentario de En Marea

Villares Naveira, Luis e dous deputados/as máis

Sobre as actuacións que debe levar a cabo o Goberno galego en relación coas perdas que está a padecer o sector gandeiro a consecuencia dos ataques do lobo e doutros animais carnívoros

BOPG nº 397, do 13.12.2018

Sométese a votación e resulta rexeitada por 5 votos a favor, 7 votos en contra e 0 abstencións.

- 41855 (10/PNC-003410)

Grupo Parlamentario dos Socialistas de Galicia

Vilán Lorenzo, Patricia e dous deputados/as máis

Sobre as actuacións da Xunta de Galicia en relación cos traballos que se están a levar a cabo no proceso de concentración parcelaria Meavía-Quintillán, no concello de Forcarei (Pontevedra)

BOPG nº 405, do 03.01.2019

Sométese a votación e resulta rexeitada por 5 votos a favor, 7 votos en contra e 0 abstencións.

Santiago de Compostela, 22 de xaneiro de 2019

Eva Solla Fernández

Vicepresidenta 2ª

1.5. Procedementos relativos a outras institucións e órganos

1.5.1. De ámbito autonómico galego

1.5.1.1. Valedor do Pobo

1.5.1.1.3. Resolucións do valedor do Pobo

Resolución da valedora do pobo, do 21 de xaneiro de 2019, pola que se actualizan as contías por recoñecemento do grao I da carreira profesional horizontal do persoal ao servizo da institución do Valedor do Pobo

O 27/12/2018 publicáronse no *Boletín Oficial do Parlamento de Galicia* as normas básicas que regulan a carreira profesional horizontal do persoal ao servizo da institución do Valedor do Pobo. No anexo I figuraban as contías estipuladas anualmente para o grao I e o seu aboamento para os exercicios 2019 e 2020.

As ditas contías equiparábanse coas adoptadas polo Sergas para o persoal administrativo e coas que manexaba a Administración xeral da Xunta de Galicia para a implantación da carreira. Non obstante, tanto no Acordo de concertación do emprego público de Galicia asinado o 15/01/2019 como na Orde do 14/01/2019 pola que se ditan instrucións sobre a confección das nóminas do persoal ao servizo da Administración autonómica para o ano 2019 (DOG do 18/01/2019), obsérvase que as contías empregadas recollen o 0,25 % de suba derivado de ter acadado a porcentaxe do PIB no ano 2018, ademais da suba do 2,25 % para o exercicio 2019.

Polo exposto, procede actualizar o importe reflectido no anexo I, motivo polo cal RESOLVO:

Primeiro. Actualizar a decembro de 2018 o importe das contías estipuladas anualmente para cada grupo de clasificación no grao I.

	Importe anual grao I
Grupo	Decembro 2018
A	2.406,24 €
B	1.683,96 €
C	1.086,00 €
D	921,72 €
E	744,84 €

Esta actualización realízase sen prexuízo da que se efectúe por mandato da normativa estatal.

Segundo. Remitir esta actualización ao *Boletín Oficial do Parlamento de Galicia* para a súa publicación.

Terceiro. Quedan modificados os importes que se aboarán ao persoal a que se lle recoñeza o grao I en concepto de complemento de produtividade ao abeiro do artigo 41 do Estatuto de persoal do Parlamento de Galicia.

Cuarto. Trasladar este acordo ao departamento de Intervención e Asuntos Económicos para o seu coñecemento e execución.

Santiago de Compostela, 21 de xaneiro de 2019
Milagros Otero Parga
Valedora do pobo

4. Informacións e correccións de erros

4.2. Correccións de erros

Resolución da Oficialía Maior pola que se procede á corrección de erros na publicación, no Boletín Oficial do Parlamento de Galicia número 401, do 19 de decembro de 2018, do Acordo da Mesa do Parlamento de Galicia do 17 de decembro de 2018 polo que se aproban as Normas reguladoras do réxime retributivo na situación de incapacidade temporal do persoal ao servizo da Administración do Parlamento de Galicia

Advertido un erro na publicación, no *Boletín Oficial do Parlamento de Galicia* número 401, do 19 de decembro de 2018, do Acordo da Mesa do Parlamento de Galicia do 17 de decembro de 2018 polo que se aproban as Normas reguladoras do réxime retributivo na situación de incapacidade temporal do persoal ao servizo da Administración do Parlamento de Galicia, procede a súa corrección nos seguintes termos:

Na páxina 135771, artigo 3, punto 2, parágrafo final, onde di: «...polo facultativo correspondente do servizo público de saúde ou da mutua.» debe dicir: «...polo facultativo correspondente do servizo público de saúde ou do servizo de prevención alleo contratado polo Parlamento de Galicia.».

Santiago de Compostela, 22 de xaneiro de 2019
Xosé Antón Sarmiento Méndez
Letrado oficial maior





XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Dirección Xeral de Relacións Institucionais
e Parlamentarias

galicia

Ref: AG



Para a súa tramitación polo Parlamento de Galicia achégolle o "*Proxecto de lei de rehabilitación e de rexeneración e renovación urbanas de Galicia*", aprobado polo Consello da Xunta de Galicia na súa reunión do día 10 de xaneiro de 2019.

Asemade achégase a certificación expedida polo secretario do Consello co visto e prace do Sr. Presidente da Xunta de Galicia, así como os documentos aos que se refire o artigo 111 do Regulamento da Cámara.

Santiago de Compostela,

A directora xeral de Relacións Institucionais e Parlamentarias

(ASINADO DIXITALMENTE)


Sr. presidente do Parlamento de Galicia





XUNTA DE GALICIA

Proxecto de Lei de rehabilitación e de rexeneración e renovación urbanas de Galicia





XUNTA DE GALICIA

Índice

Título Preliminar. Disposicións xerais

Capítulo I. Principios xerais

Artigo 1. Obxecto e ámbito de aplicación

Artigo 2. Definicións

Artigo 3. Principios e criterios da rehabilitación edificatoria e a rexeneración e renovación urbanas

Artigo 4. Persoas obrigadas e os seus deberes

Capítulo II: Informe de avaliación dos edificios

Artigo 5. Concepto de informe de avaliación dos edificios

Artigo 6. Contido do informe de avaliación dos edificios

Artigo 7. Obrigatoriedade do informe de avaliación dos edificios

Artigo 8. Vixencia e periodicidade do informe de avaliación dos edificios

Artigo 9. Capacitación para subscribir o informe de avaliación dos edificios

Artigo 10. Rexistro de Informes de Avaliación de Edificios

Título I. Actuacións sobre o medio urbano

Capítulo I. Disposicións xerais

Artigo 11. A iniciativa na ordenación das actuacións no medio urbano

Artigo 12. Requisitos previos para a ordenación das actuacións no medio urbano.

Artigo 13. Efectos da delimitación espacial dun ámbito de rehabilitación edificatoria, ou de rexeneración ou renovación urbanas.

Artigo 14. Actuacións de rehabilitación edificatoria nos Camiños de Santiago

Capítulo II. A planificación das actuacións no medio urbano

Sección 1ª. Planificación e instrumentos para as actuacións no medio urbano

Artigo 15. Planificación das actuacións no medio urbano

Sección 2ª. Tramitación simplificada das modificacións dos instrumentos de planeamento no medio urbano

Artigo 16. Tramitación simplificada das modificacións dos instrumentos de planeamento para actuacións de rehabilitación edificatoria e de rexeneración e renovación urbanas

Artigo 17. Tramitación medioambiental

Artigo 18. Procedemento de tramitación das modificacións puntuais non substanciais de planeamento

Capítulo III. A xestión das actuacións no medio urbano

Artigo 19. As formas de xestión

Artigo 20. Normas específicas de xestión da rehabilitación edificatoria en solo urbano consolidado

Artigo 21. Normas específicas de xestión da rexeneración e renovación urbanas en solo urbano consolidado

Artigo 22. Normas específicas de xestión da rexeneración e renovación urbanas en solo urbano non consolidado

Artigo 23. Pago en especie dos prezos xustos expropiatorios



XUNTA DE GALICIA

Capítulo IV. Obrigas relativas á edificación, conservación e rehabilitación

Sección 1ª. Disposicións xerais

Artigo 24. Obrigas relativas á edificación, conservación e rehabilitación

Artigo 25. Redución do contido do dereito da propiedade do solo

Artigo 26. Procedemento para a declaración de incumprimento das obrigas relativas á edificación, conservación e rehabilitación

Artigo 27. Requisitos da resolución de declaración do incumprimento

Sección 2ª. Da execución forzosa e os seus medios

Artigo 28. Medios de execución forzosa

Sección 3ª. Ordes de execución

Artigo 29. Ordes de execución

Artigo 30. Incumprimento das ordes de execución

Sección 4ª. Constrinximento sobre o patrimonio

Artigo 31. Constrinximento sobre o patrimonio

Sección 5ª. Da expropiación forzosa

Artigo 32. Expropiación forzosa por incumprimento das obrigas relativas á edificación, conservación e rehabilitación

Artigo 33. Expropiación en materia de accesibilidade

Sección 6ª. Da venda e substitución forzosas

Artigo 34. Réxime de venda ou substitución forzosas

Artigo 35. Procedemento da venda ou substitución forzosas

Artigo 36. Venda forzosa

Artigo 37. Obrigas da persoa adquirente

Artigo 38. Substitución forzosa

Artigo 39. Obrigas da persoa adxudicataria da substitución forzosa

Capítulo V. As intervencións nos conxuntos históricos e ámbitos obxecto de planeamento especial de protección

Sección 1ª. Normas de aplicación directa

Artigo 40. Ámbitos afectados

Artigo 41. Edificios con nivel de protección ambiental ou nivel de protección asimilable

Artigo 42. Edificios con nivel de protección estrutural ou nivel de protección asimilable

Artigo 43. Parcelario

Sección 2ª. Licenzas directas

Artigo 44. Licenzas directas

Sección 3ª. Plans especiais de protección

Artigo 45. Modelo de plan especial de protección

Título II. Áreas de intervención no medio urbano declaradas pola Administración autonómica

Capítulo I. Áreas de intervención no medio urbano declaradas pola Administración autonómica

Artigo 46. Concepto, declaración e contido.

Artigo 47. Clases de áreas de intervención no medio urbano declaradas pola Administración autonómica



XUNTA DE GALICIA

Artigo 48. Efectos da declaración dun área de intervención no medio urbano declarada pola Administración autonómica

Capítulo II. Áreas de Rehabilitación Integral

Sección 1ª. Disposicións xerais

Artigo 49. Áreas de Rehabilitación Integral

Artigo 50. Clases de áreas de rehabilitación integral

Artigo 51. Xestión das áreas de rehabilitación integral

Sección 2ª. Áreas de rehabilitación integral supramunicipal

Artigo 52. Áreas de rehabilitación integral supramunicipal

Artigo 53. Xestión das áreas de rehabilitación integral supramunicipais

Capítulo III. Áreas de rexeneración urbana de interese autonómico (Rexurbe)

Sección 1ª: Delimitación e declaración das áreas de rexeneración urbana de interese autonómico (Rexurbe)

Artigo 54. Delimitación das áreas de rexeneración urbana de interese autonómico (Rexurbe)

Artigo 55. Declaración das áreas Rexurbe

Sección 2ª: Zonas de especial necesidade de rehabilitación

Artigo 56. Declaracións de zona de especial necesidade de rehabilitación nas áreas Rexurbe

Artigo 57. Xestión anticipada nas ZER

Sección 3ª. Plan de dinamización das áreas Rexurbe

Artigo 58. Concepto e obxecto dos plans de dinamización das áreas Rexurbe

Artigo 59. Contido dos plans de dinamización

Artigo 60. Procedemento de formulación e aprobación dos plans de dinamización

Artigo 61. Modificacións e revisións dos plans de dinamización

Capítulo IV. Núcleos rurais en estado de abandono

Artigo 62. Declaración de núcleo rural en estado de abandono

Artigo 63. Rexistro de núcleos rurais abandonados

Artigo 64. Procedemento de venda

Artigo 65. Difusión a nivel autonómico

Título III Coordinación administrativa para a rehabilitación edificatoria e a rexeneración e renovación urbanas

Capítulo I. Disposición xerais

Artigo 66. Coordinación administrativa

Capítulo II. Oficinas de rehabilitación

Artigo 67. Concepto

Artigo 68. Funcións das oficinas de rehabilitación

Artigo 69. Rede de oficinas de rehabilitación

Capítulo III. Centros Rexurbe e Comisións de seguimento das áreas Rexurbe

Sección 1ª. Centros Rexurbe

Artigo 70. Concepto

Artigo 71. Ámbito de actuación dos centros Rexurbe

Artigo 72. Procedemento de creación dos centros Rexurbe

Artigo 73. Financiamento dos centros Rexurbe



XUNTA DE GALICIA

Artigo 74. Atribucións de funcións aos centros Rexurbe

Artigo 75. Funcións dos centros Rexurbe

Sección 2ª. Comisións de seguimento das áreas Rexurbe

Artigo 76. Comisións de seguimento

Artigo 77. Funcións das Comisións de Seguimento

Título IV. Financiamento das actuacións de rehabilitación edificatoria e de rexeneración e renovación urbanas

Capítulo I. Das medidas de fomento da rehabilitación edificatoria e da rexeneración e renovación urbanas

Sección 1ª Disposicións xerais

Artigo 78. Programas de financiamento

Artigo 79. Acordos para o financiamento das actuacións de rehabilitación edificatoria e de rexeneración e renovación urbanas

Artigo 80. Convenios para a implantación de programas específicos de financiamento das actuacións

Artigo 81. Axudas para a elaboración e tramitación do planeamento urbanístico

Sección 2ª. Fondo de cooperación

Artigo 82. Fondo de cooperación para o apoio ao financiamento de actuacións de rehabilitación e conservación do patrimonio construído en concellos de menos de 50.000 habitantes

Artigo 83. Carácter e dotación do Fondo de cooperación

Capítulo II. Das medidas específicas de fomento e financiamento das áreas Rexurbe

Sección 1ª. Programas de financiamento das áreas Rexurbe

Artigo 84. Actuacións protexibles nas áreas Rexurbe

Artigo 85. Medidas de financiamento nas áreas Rexurbe

Artigo 86. Actuacións directas polo IGVS

Artigo 87. Financiamento das actuacións de iniciativa privada

Artigo 88. Axudas para a adquisición e alugamento de vivendas nas áreas Rexurbe

Artigo 89. Medidas de fomento do realoxo e retorno das persoas habitantes das áreas Rexurbe

Artigo 90. Programas para implantar plans de promoción do envellecemento activo e da convivencia interxeracional.

Artigo 91. Axudas para a rehabilitación de edificios destinados a equipamento de carácter social, cultural ou educativo

Artigo 92. Xestión de locais do IGVS no ámbito

Artigo 93. Axudas para a instalación de redes e servizos

Artigo 94. Axudas para espazos públicos

Artigo 95. Axudas para actuacións arqueolóxicas

Artigo 96. Bonificacións fiscais municipais e recadación de multas coercitivas

Sección 2ª. Fondo Rexurbe

Artigo 97. Fondo Rexurbe para o apoio ao financiamento de proxectos de intervención integral nas áreas Rexurbe.

Artigo 98. Carácter e dotación do Fondo Rexurbe



XUNTA DE GALICIA

Capítulo III. Do canon de inmoables en estado de abandono

Sección 1ª. Disposicións xerais

Artigo 99. Creación, natureza e obxecto do canon de inmoables declarados en estado de abandono

Artigo 100. Finalidade do canon

Artigo 101. Ámbito de aplicación

Artigo 102. Afectación da recadación

Artigo 103. Normativa de aplicación

Artigo 104. Inmoable declarado en estado de abandono

Artigo 105. Censo de inmoables declarados en estado de abandono

Sección 2ª. Elementos do tributo

Artigo 106. Feito imponible

Artigo 107. Suxeitos pasivos

Artigo 108. Base imponible

Artigo 109. Tipo de gravame e cota tributaria

Artigo 110. Exención fiscal

Artigo 111. Período impositivo e devindicación

Sección 3ª. Aplicación do canon

Artigo 112. Normas de aplicación

Artigo 113. Xestión do canon

Artigo 114. Prazos, forma e lugar de presentación

Artigo 115. Utilización de tecnoloxías informáticas e electrónicas

Artigo 116. Liquidacións provisionais

Artigo 117. Potestade sancionadora

Artigo 118. Revisión

Artigo 119. Órganos competentes

Artigo 120. Órganos de colaboración

Capítulo IV. Das medidas de apoio á recuperación de aldeas no rural e dos núcleos rurais en estado de abandono

Artigo 121. Actuacións impulsadas pola Xunta de Galicia

Disposición adicional primeira. Adquisición directa de terreos e/ou edificacións polo IGVS

Disposición adicional segunda. Aplicación das medidas específicas de fomento e financiamento das áreas Rexurbe a outros ámbitos

Disposición transitoria primeira. Homoxeneización de catálogos de protección

Disposición transitoria segunda. Áreas de rehabilitación declaradas

Disposición transitoria terceira. Oficinas de rehabilitación existentes

Disposición transitoria cuarta. Consorcio do Casco Vello de Vigo

Disposición derogatoria

Disposición derradeira primeira. Modificación da Lei 2/2016, do 10 de febreiro, do solo de Galicia

Disposición derradeira segunda. Modificación da Lei 5/2016, do 4 de maio, do patrimonio cultural de Galicia




XUNTA DE GALICIA

Disposición derradeira terceira. Modificación da Lei 8/2012, do 29 de xuño, de vivenda de Galicia

Disposición derradeira cuarta. Habilitación para a Lei de Orzamentos Xerais da Comunidade Autónoma de Galicia

Disposición derradeira quinta. Desenvolvemento regulamentario

Disposición derradeira sexta. Entrada en vigor





XUNTA DE GALICIA

Exposición de motivos

I

A rehabilitación edificatoria, a rexeneración e a renovación urbanas son hoxe conceptos fundamentais no ámbito da estruturación do territorio e do espazo urbano, baseadas no sostemento social, económico e ambiental.

A situación de deterioración de moitos ámbitos, tanto urbanos como rurais, teñen causas diferentes que foron analizadas nas actuacións previas á elaboración do texto da lei, destacando os condicionantes de carácter normativo, administrativo, económico e especialmente os ligados á habitabilidade e accesibilidade das vivendas e aos factores sociais e demográficos entre os que se constata, en moitos casos, o envellecemento da poboación residente. Estas dinámicas implicaron o progresivo declive e abandono destes ámbitos que en moitos casos, sobre todo nas vilas pequenas e núcleos rurais, ademais de supoñer a perda dun rico patrimonio cultural, fixose estensivo a todo o núcleo poboacional no que se insertan. Por iso, é necesario adoptar diferentes medidas que permitan atallar esta situación sempre dende a perspectiva de que a mellor forma de conservar é habitar, ocupar os espazos e xerar actividade.

Hai que salientar que a rehabilitación e a reutilización dos espazos residenciais abandonados ou degradados, xa sexa nas cidades, nas vilas ou nos núcleos rurais, xogan un papel fundamental nas políticas de vivenda como solución eficiente, sostible e de futuro á hora de dar resposta ás necesidades de vivenda da poboación, de conservar o patrimonio construído e de minorar os impactos no medio.

A partir do coñecemento do tecido urbano e da súa evolución, a través dos procesos de rehabilitación, rexeneración e renovación búscase acadar o obxectivo de conservar o rico patrimonio edificatorio, tanto no ámbito rural como nas vilas e cidades galegas, de manter os seus usos característicos e a súa poboación tradicional e, ao mesmo tempo, conseguir atraer ás novas xeracións para que poidan asentarse nos espazos renovados.

Os conxuntos históricos deben desenvolver un papel activo como espazos que doten á cidade dun valor engadido, formando parte do conxunto da vida cidadá e repercutindo



XUNTA DE GALICIA

favorablemente no desenvolvemento global da cidade ou da vila.

Coa implantación e pulo dos equipamentos culturais, coa dinamización da actividade comercial, coa preservación e mellora dos espazos públicos de calidade e coas axudas á rehabilitación edificatoria, para acadar a mellora da habitabilidade e eficiencia enerxética das vivendas e edificios, preténdese o mantemento da poboación tradicional fronte a procesos de xentrificación.

A conservación dos asentamentos nos ámbitos rurais debe axudar a manter un mellor equilibrio no reparto da poboación sobre o territorio, co fin de evitar o abandono e o despoboamento destas zonas e facilitar o mantemento de actividades económicas e de servizos que doutra forma están abocados a desaparecer.

Neste senso, a intervención pública é fundamental para impulsar e fomentar a recuperación do construído. A mellora destes espazos debe xurdir do deseño de accións coordinadas que doten de vitalidade a estas zonas e as fagan atractivas como ámbitos de residencia e actividade.

Por todo o anterior, considérase necesario contar cunha ferramenta legal eficaz que facilite as actuacións de rehabilitación edificatoria e de rexeneración e renovación urbanas, especialmente naqueles espazos máis vulnerables e abandonados, coa finalidade de mellorar as edificacións e os espazos públicos e servir ademais de instrumento para o desenvolvemento económico buscando, en definitiva, a satisfacción do interese xeral na preservación do noso patrimonio edificado, a dinamización das nosas vilas e cidades e a mellora da calidade de vida de todos os galegos e galegas.

Así, esta lei, de acordo coas liñas estratéxicas apuntadas, nace coa vocación de crear un marco estable, integrado e claro que permita impulsar e axilizar as actuacións en materia de rehabilitación e rexeneración urbanas, ao facilitar as intervencións das persoas particulares e ao coordinar as políticas públicas nesta materia. Permitirá, así mesmo, dar resposta ás necesidades de actuación nas vivendas e locais, mellorar os servizos e infraestruturas, integrar as políticas de protección do patrimonio cultural, atender ás necesidades de mobilidade das persoas residentes e fomentar a eficiencia enerxética e o uso de enerxías renovables en consonancia coas directrices europeas.

Consecuentemente a lei pon especial incidencia, ademais de na rehabilitación dos edificios, na rexeneración urbana de áreas degradadas a través da realización de plans de viabilidade,



XUNTA DE GALICIA

diagnose e integración, para conseguir a recuperación e accesibilidade dos espazos urbanos e posibilitar o deseño de programas dirixidos ao asentamento da poboación.

A lei persegue, en aplicación dos principios de proporcionalidade e eficiencia, a simplificación das tramitacións administrativas necesarias para a realización das actuacións de rehabilitación co fin de impulsar a participación pública e privada nas actuacións de rexeneración e renovación de ámbitos urbanos ou rurais en estado de abandono, e conseguir unha verdadeira transformación destes espazos, permitindo a conservación do noso patrimonio construído, facilitando o acceso á vivenda a moitos cidadáns e cidadás e mellorando a calidade de vida das persoas xa residentes.

Desde o punto de vista da seguranza xurídica, esta lei ten pleno encaixe no marco europeo e estatal. Esta lei enmárcase na estratexia común europea nas materias de rehabilitación e de desenvolvemento sostible, recollida na Carta de Leipzig sobre Cidades Europeas Sostibles de 2007, na Declaración de Marsella do 25 de novembro de 2008, na Declaración de Toledo do 22 de xuño de 2010 e na Estratexia “Europa 2020”, aprobada polo Consejo Europeo o 17 de xuño de 2010. Así mesmo, esta lei garda coherencia co resto do ordenamento xurídico nacional, no que o texto refundido da Lei do solo e rehabilitación urbana, aprobado polo Real Decreto legislativo 7/2015, do 30 de outubro, regula, para todo o territorio estatal, as condicións básicas que garanten un desenvolvemento sostible, competitivo e eficiente do medio urbano, mediante o impulso e o fomento das actuacións que conducen á rehabilitación dos edificios e á rexeneración e renovación dos tecidos urbanos existentes, cando sexan necesarias para asegurar aos cidadáns unha adecuada calidade de vida e a efectividade do seu dereito a gozar dunha vivenda digna e adecuada.

Por último, hai que sinalar que a lei se tramitou con suxeición ao principio de transparencia, buscando a participación activa das potenciais persoas destinatarias.

II

A Lei estrutúrase nun título preliminar, catro títulos, dúas disposicións adicionais, catro disposicións transitorias, unha disposición derogatoria, e seis disposicións derradeiras.

O título preliminar establece o obxecto da lei e as disposicións comúns ás diferentes actuacións que nela se prevén.



XUNTA DE GALICIA

Inclúese un glosario de conceptos que teñen unha especial relevancia no texto da lei. Para estes efectos, recóllense as definicións que figuran no Real decreto legislativo 7/2015, do 30 de outubro, polo que se aproba o texto refundido da Lei do solo e rehabilitación urbana, así como no Real decreto 314/2016, do 17 de marzo, polo que se aproba o Código Técnico da Edificación, código ao que remite a Lei 38/1999, do 5 de novembro, de ordenación da edificación, toda vez que é normativa básica, engadindo aquelas outras que non aparecen definidas en ambos textos.

Regúlase tamén neste título o informe de avaliación de edificios dando resposta así á situación creada tras a Sentenza 143/2017, do 14 de decembro de 2017, do Tribunal Constitucional, e dándolle un marco normativo na Comunidade Autónoma de Galicia.

III

O título I, de acordo co criterio marcado pola normativa básica estatal, regula a rehabilitación edificatoria e a rexeneración e renovación urbanas como actuacións no medio urbano. Neste sentido é necesario apoiar as actuacións de conservación de edificios e vivendas, mellorando as condicións de habitabilidade, velando por dotalas da seguridade estrutural que precisan, incentivando a mellora da eficiencia enerxética e actuando no eido da eliminación de barreiras arquitectónicas para garantir a accesibilidade, sen esquecer a especial incidencia que teñen na nosa comunidade autónoma o medio rural e as vivendas unifamiliares.

Establécense os requisitos e os efectos da delimitación dun ámbito da actuación, mediante un acordo administrativo de identificación da actuación illada de rehabilitación ou de delimitación dun área de actuación conxunta, xa sexa realizada e aprobada por un concello ou pola Administración autonómica.

Inclúense medidas que facilitan as actuacións de rehabilitación, tanto para a realización de obras orientadas a mellorar a accesibilidade e eficiencia enerxética das edificacións, como para intervenir en inmobles que se atopan en total abandono e deterioración, mediante a regulación dos procedementos expropiación, venda e substitución forzosas, podendo minorar o dereito de propiedade do solo nunha porcentaxe non superior ao 50 % do seu valor de tal xeito, que estas edificacións non sexan un obstáculo permanente para a recuperación dun ámbito. En todo caso, sinálase a necesidade de arbitrar mecanismos que garantan os dereitos das persoas propietarias ou ocupantes que non dispoñen de recursos para afrontar



XUNTA DE GALICIA

directamente os gastos das actuacións.

Respecto a estes procedementos é importante salientar que a regulación busca dotar á administración actuante dun mecanismo áxil que permita garantir o cumprimento das obrigas de edificación, conservación e rehabilitación dos inmobles, axustado á normativa básica estatal e completando a regulación da lexislación do solo de Galicia prevista exclusivamente para os concellos nos que exista Rexistro de Soares ao que se lle confire carácter voluntario en virtude da disposición derradeira primeira.

Inclúense medidas orientadas a axilizar a tramitacións das autorizacións administrativas para as intervencións de rehabilitación nos Camiños de Santiago.

Este título dedícase tamén á planificación e xestión da rehabilitación edificatoria, e da rexeneración e renovación urbanas, dende unha perspectiva urbanística. Neste ámbito cabe sinalar a regulación dun procedemento de tramitación simplificada dos instrumentos de planeamento para as modificacións puntuais non substanciais, de escasa entidade e alcance reducido e local, que afectan a unha superficie moi limitada do ámbito e que no modifiquen a clasificación do solo.

Así mesmo, neste título regúlanse as consecuencias do incumprimento do deber de conservación e rehabilitación polas persoas propietarias dos inmobles, e o procedemento para declarar o dito incumprimento.

Establécense tamén unhas normas de aplicación directa para todos aqueles ámbitos que están, ou deberían estar, regulados por un plan especial de protección, co obxecto de articular unhas normas que sexan de inmediata aplicación e que permitan modular as determinacións do planeamento xeral ou dos plans especiais, ou reducir certas barreiras á rehabilitación, mantendo o criterio básico da protección dos elementos e edificacións que así o merezan. Así, inclúense unha serie de actuacións permitidas en función do nivel de protección da edificación, de tal xeito que, sen desatender a debida protección do inmovible nin do ámbito onde se localiza, se poidan realizar intervencións que permitan dispoñer dunha edificación cos niveis de prestacións e confort actualmente requiridos e posibilitar a súa recuperación e ocupación, o que constitúe, sen dúbida, a mellor forma de conservación.



XUNTA DE GALICIA

O título II regula as áreas de intervención no medio urbano declaradas pola Administración autonómica, coa potenciación das xa existentes Áreas de Rehabilitación Integral (ARI), para darlle un contido máis amplo ás actuacións a realizar e previndo o financiamento das actuacións dentro do seu ámbito.

A declaración destas ARI afecta a ámbitos urbanos en estado de deterioración e que precisan dun apoio público para que os residentes e persoas propietarias poidan acometer actuacións de mellora nas súas vivendas, á vez que o concello realiza intervencións nos espazos públicos. Estas áreas serán declaradas pola Presidencia do Instituto Galego da Vivenda e Solo, logo dos informes que se estimen oportunos.

Aqueles ámbitos especialmente degradados cuxa delimitación coincida, total ou parcialmente, cun conxunto histórico declarado ben de interese cultural poderán ser declarados polo Consello da Xunta de Galicia, por proposta da consellería competente en materia de vivenda, e logo dos informes oportunos, como Áreas de Rexeneración Urbana de Interese Autonómico (Rexurbe), de tal xeito que se poidan realizar actuacións de rehabilitación ao mesmo tempo que se articulan medidas sociais, urbanísticas, ambientais e económicas, enmarcadas nunha estratexia administrativa global e unitaria. Nestes ámbitos é necesario dispoñer dun Plan de dinamización como un instrumento estratéxico que marcará as actuacións a realizar, tanto en materia de rehabilitación das vivendas e protección do patrimonio cultural como de todas aquelas medidas que contribúan a unha revitalización integral do ámbito. O plan será aprobado polo Consello da Xunta de Galicia e deberá incluír medidas de impulso das diferentes administracións participantes.

Singular atención merecen as zonas de especial necesidade de rehabilitación (ZER) que se declaran para edificios específicos ou conxuntos deles, cando sexa preciso realizar unha intervención urxente debido ao seu estado de deterioración, á súa especial incidencia para a recuperación do ámbito ou ao interese xeral de certas actuacións para facilitar a instalación de dotacións ou equipamentos que teñan unha especial relevancia ou constitúan un importante impulso para a recuperación económica ou social do ámbito.

Tamén neste título se presta unha especial atención aos núcleos rurais en estado de abandono, propondo formas de actuación que posibiliten a súa rehabilitación, mediante un procedemento público de venda, rexistros municipais e unha plataforma informática, a nivel autonómico, para a difusión dos anteditos procedementos.



XUNTA DE GALICIA

V

O título III contén diferentes medidas orientadas á coordinación e simplificación administrativa; e así mantense a importancia das Oficinas de Rehabilitación coa creación dunha rede de oficinas para mellorar a súa eficacia e coordinación. Para estes efectos, crearase unha plataforma informática de rehabilitación, con acceso compartido para todas as oficinas onde se poderán fixar directrices, realizar as consultas, compartir solucións técnicas, dispoñer dun sistema de información xeográfica, orientado a facilitar a programación das actuacións, así como calquera outra información que se considere oportuna.

Así mesmo créanse os centros Rexurbe, vinculados ás Áreas de Rexeneración Urbana de Interese Autonómico. Estes centros requirirán uns medios materiais e persoais e unha solvencia técnica que lles permita asumir competencias da Administración local e autonómica na planificación e execución das actuacións de rexeneración, tanto dende o punto de vista de vivenda e patrimonio cultural, como social e económico.

VI

O título IV está dedicado ás medidas de fomento e ao financiamento dos procesos de rehabilitación edificatoria e de rexeneración e renovación urbanas. Así, inclúense medidas de apoio para posibilitar acceder a diferentes tipos de financiamento público: fondos estruturais europeos, estatais, autonómicos e locais, ademais de buscar outras fórmulas, como instrumentos financeiros ou incentivos fiscais. Así mesmo, é imprescindible establecer formas de colaboración público-privado para atraer os investimentos dos promotores inmobiliarios e das persoas particulares ás actuacións en materia de rehabilitación edificatoria.

Nas áreas Rexurbe, ademais de ser de aplicación todas as medidas previstas con carácter xeral para as áreas de rexeneración urbana, poderanse realizar intervencións directas da Xunta de Galicia, de tal xeito que, en función das súas dispoñibilidades orzamentarias, adquira e rehabilite edificios. Estas intervencións terán a finalidade de iniciar a recuperación da zona de tal forma que supoñan un estímulo para que a iniciativa privada continúe coa rehabilitación doutras unidades edificatorias.

Nesta liña, ademais das axudas ás persoas particulares, é necesario establecer axudas ás persoas promotoras para que recuperen edificacións completas destinando unha parte delas ao alugamento cunha renda máxima taxada; favorecer a constitución de cooperativas para a



XUNTA DE GALICIA

rehabilitación; poñer edificacións en mans de quen as vaia rehabilitar mediante dereito de superficie, cesión, permuta de cousa futura, arrendamento con ou sen opción de compra ou venda, para reducir o investimento inicial ou facilitar a adquisición dos inmobles ou fomentar a rehabilitación con destino a vivenda de promoción pública concertada; implantar plans de promoción do envellecemento activo e da convivencia interxeracional e fomentar a implantación de actividades comerciais e de servizos, tanto públicos como de profesionais no ámbito.

Ademais deste apoio á iniciativa privada, a lei é consecuente cos obxectivos expostos e prevé expresamente medidas destinadas a posibilitar o realoxo e retorno das persoas habitantes das áreas Rexurbe e axudas para a rehabilitación con destino a equipamentos de carácter social, cultural ou educativo e para a urbanización, reurbanización, acondicionamento e mellora da accesibilidade nos espazos públicos.

Merece especial atención o canon de inmobles declarados en estado de abandono que se crea nesta lei como tributo propio da Comunidade Autónoma de Galicia, con natureza de imposto, de carácter real e finalidade extrafiscal, que somete a gravame aos inmobles declarados en estado de abandono nos ámbitos nos que estea declarada un área Rexurbe. Este tributo nace coa finalidade de impulsar as actuacións de rehabilitación nas áreas Rexurbe e evitar o estado de abandono das edificacións existentes nestas áreas reducindo, consecuentemente o número de inmobles en estado de abandono. Os ingresos efectivamente obtidos pola recadación deste tributo, deducidos os custes de xestión, destinaranse a financiar as actuacións e medidas de dinamización e a protección da área Rexurbe na que se recade. Esta afección nace da finalidade mesma do canon, de xeito que as persoas propietarias incumpridoras contribúan efectivamente á recuperación, impulso e dinamización da área Rexurbe que, non debe esquecerse, é un área de interese autonómico.

VII

A lei inclúe dúas disposicións adicionais, catro disposicións transitorias, unha disposición derogatoria, e seis disposicións derradeiras.

A disposición adicional primeira, dedicada á adquisición directa de terreos e/ou edificacións polo Instituto Galego da Vivenda e Solo, recolle a posibilidade de que o Instituto adquira directamente bens inmobles no marco das actuacións previstas na Lei, co obxectivo de




XUNTA DE GALICIA

axilizar os procesos de rehabilitación edificatoria, rexeneración e renovación urbanas. A disposición adicional segunda, posibilita a aplicación das medidas específicas de fomento e financiamento das áreas Rexurbe a outros ámbitos.

As disposicións transitorias refírense á homoxeneización de catálogos de protección, ao réxime das áreas de rehabilitación declaradas e ao das oficinas de rehabilitación existentes e, a última, ao Consorcio do Casco Vello de Vigo.

Termina a Lei con seis disposicións derradeiras entre as que merecen especial atención as tres primeiras que modifican diferentes textos legais vixentes. Así, a primeira disposición adicional modifica a Lei 2/2016, do 10 de febreiro, do solo de Galicia, no relativo o Rexistro de Soares e a tipificación da infracción polo incumprimento do deber de cumprimentar e tempo e forme o informe de avaliación dos edificios; a segunda, a Lei 5/2016, do 4 de maio, do patrimonio cultural de Galicia, para estender o réxime de autorizacións previsto no artigo 58 aos bens catalogados con plans especiais de protección aprobados definitivamente e para engadir un dous novos supostos á regulación das infraccións leves e outro ás infraccións graves; a terceira, á Lei 8/2012, do 29 de xuño, de vivenda de Galicia, no tocante ás actuacións do Instituto Galego da Vivenda e Solo. A disposición final cuarta habilita á lei de orzamentos para modificar calquera elemento do canon de inmobles declarados en estado de abandono e na entrada en vigor da Lei prevese expresamente que o dito canon comezará a exixirse dende o 1 de xaneiro de 2020.





XUNTA DE GALICIA

TÍTULO PRELIMINAR

Disposicións xerais

CAPÍTULO I

Principios xerais

Artigo 1. Obxecto e ámbito de aplicación

A presente lei ten por obxecto regular a rehabilitación edificatoria e a rexeneración e renovación urbanas na Comunidade Autónoma de Galicia, con especial incidencia na conservación e mellora dos conxuntos históricos, dos núcleos rurais e do patrimonio edificado, na habitabilidade das vivendas e na calidade dos espazos públicos.



XUNTA DE GALICIA

Artigo 2. *Definicións*

Para os efectos do disposto nesta lei, e sen prexuízo do sinalado no artigo 40 da Lei 5/2016, do 4 de maio, do patrimonio cultural de Galicia, os conceptos incluídos neste artigo serán interpretados e aplicados co significado e alcance seguintes:

a) Actuacións edificatorias: as actuacións de nova edificación, de substitución da edificación existente e as de rehabilitación edificatoria sempre que non se trate das actuacións de transformación urbanística definidas no Real decreto legislativo 7/2015, do 30 de outubro, polo que se aproba o texto refundido da Lei do solo e rehabilitación urbana, aínda que poidan requirir obras complementarias de urbanización. Estas actuacións poden ser obras de nova edificación, obras de substitución dunha edificación existente e actuacións de rehabilitación edificatoria.

b) Obras de nova edificación: obras de construción dun novo edificio sobre un soar baleiro.

c) Obras de substitución dunha edificación existente: obras que implican a demolición dun edificio ou das partes del que se conserven e a construción sobre o soar baleiro dun novo edificio.

d) Actuacións de rehabilitación edificatoria: actuacións que consisten na realización das obras e traballos de mantemento ou de intervención nos edificios existentes, as súas instalacións e espazos comúns nos termos dispostos pola Lei 38/1999, do 5 de novembro, de ordenación da edificación.

e) Actuacións de mantemento: actuacións de rehabilitación edificatoria que consisten no conxunto de traballos e obras que se deben efectuar periodicamente para previr a deterioración dun edificio ou as reparacións puntuais que se realicen neste, co obxecto de mantelo en bo estado para que, cunha fiabilidade axeitada, cumpra cos requisitos básicos da edificación.

f) Actuacións de intervención nos edificios existentes: actuacións de rehabilitación edificatoria que consisten na ampliación, reforma ou cambio de uso que se realicen nos edificios existentes que non teñan a consideración de actuacións de mantemento.

g) Obras de ampliación: obras nas que se incrementa a superficie ou o volume construídos dunha edificación existente.



XUNTA DE GALICIA

- h) Obras de reforma: calquera traballo ou obra nun edificio existente distinto do que se leve a cabo para o exclusivo mantemento do edificio.
- i) Cambio de uso: as actuacións que, comportando ou non a execución de obras, teñan por obxecto modificar o uso actual ou previsto nun edificio, ou nunha parte del, por outro permitido pola lexislación urbanística.
- j) Actuacións sobre o medio urbano: son as actuacións de rehabilitación edificatoria e as de rexeneración e renovación urbanas, desenvolvidas en solo urbano ou de núcleo rural.
- k) Actuacións illadas de rehabilitación: actuacións identificadas como tales pola administración competente, seguindo o procedemento recollido nesta lei, co obxecto de establecer e ordenar a rehabilitación, substitución ou edificación de inmobles.
- l) Actuacións de rexeneración e renovación urbana: as actuacións que afectan tanto a edificios, como a tecidos urbanos, podendo chegar a incluír obras de nova edificación en substitución de edificios previamente demolidos.
- m) Actuacións de rexeneración e renovación urbana de carácter integrado: as actuacións de rexeneración e renovación urbana cando articulen medidas sociais ambientais e económicas enmarcadas nunha estratexia administrativa global e unitaria.
- n) Conxunto histórico: a agrupación de bens que conforman unha unidade de asentamento de poboación, continua ou dispersa, cunha estrutura física representativa da evolución dunha comunidade que resulta un testemuño cultural significativo por interese artístico, histórico, arquitectónico, arqueolóxico, etnolóxico, industrial ou científico e técnico, aínda que individualmente os elementos que a conforman non teñan unha especial relevancia; e que, conforme ao disposto na lexislación de patrimonio cultural da Comunidade Autónoma de Galicia, teñan a consideración de ben de interese cultural ou de ben catalogado.




XUNTA DE GALICIA

Artigo 3. *Principios e criterios da rehabilitación edificatoria e a rexeneración e renovación urbanas*

1. A Administración da Comunidade Autónoma de Galicia e as entidades locais de Galicia favorecerán cos seus plans, proxectos e programas a rehabilitación edificatoria e a rexeneración e renovación urbanas, aplicando os principios de protección, conservación e reutilización do patrimonio construído, cohesión social, desenvolvemento urbano compacto, sustentabilidade e eficiencia enerxética.

2. A planificación das actuacións de rehabilitación edificatoria e a rexeneración e renovación urbanas axustaranse aos criterios seguintes:

- a) O fomento da calidade de vida da cidadanía e a habitabilidade das súas vivendas.
- b) A protección, conservación e acrecentamento dos bens inmobles que forman parte do patrimonio cultural de Galicia, posibilitando a adecuación das edificacións aos usos que garantan a súa preservación e a revitalización do ámbito no que se emprazan de forma coherente coa salvagarda dos seus valores culturais.
- c) A dinamización económica dos conxuntos históricos e o mantemento da vitalidade urbana.
- d) A promoción da diversidade e a cohesión social, a calidade e a accesibilidade dos espazos públicos.
- e) A mestura de usos, admitindo a maior compatibilidade das actividades produtivas e comerciais co uso residencial.
- f) O desenvolvemento das infraestruturas dirixidas ás novas tecnoloxías da información.
- g) A redución do consumo enerxético mediante a utilización de sistemas pasivos, o fomento da utilización de sistemas centralizados de produción de enerxía e o uso de enerxías renovables, tanto a nivel de edificacións como de conxuntos urbanos.
- h) O aforro de auga e mellor aproveitamento dos recursos hídricos.





XUNTA DE GALICIA

Artigo 4. *Persoas obrigadas e os seus deberes*

1. As persoas e comunidades titulares de terreos e construcións, instalacións e edificios teñen o deber de mantelos nas debidas condicións de seguridade, salubridade, eficiencia enerxética, ornato público e decoro, realizando neles os traballos e as obras precisas para conservalos ou melloralos, co fin de manter as condicións requiridas para a habitabilidade, a accesibilidade ou o uso efectivo correspondente cun consumo enerxético responsable. No caso de que os bens inmoebles da súa titularidade formasen parte do patrimonio cultural de Galicia tamén están obrigadas a conservalos, mantelos e custodialos debidamente para evitar a súa perda, destrución ou deterioración.
2. No caso de transmisión, as persoas adquirentes subrogaranse nos dereitos e deberes das anteriores persoas titulares, así como nas obrigas asumidas por estas fronte á administración competente e que figuren consignadas rexistralmente, nos termos establecidos pola lexislación estatal.
3. O incumprimento dos deberes de conservación, mellora, rehabilitación edificatoria ou rexeneración e renovación urbanas habilitará á Administración municipal, e nos casos previstos nesta lei á Administración autonómica, para a execución subsidiaria das obras ou labores pertinentes, así como para a aplicación do réxime de venda ou substitución forzosas ou expropiación por incumprimento da función social da propiedade, sen prexuízo doutras medidas que se conteñan na lexislación sobre ordenación territorial e urbanística.




XUNTA DE GALICIA

CAPÍTULO II

Informe de avaliación dos edificios

Artigo 5. *Concepto de informe de avaliación dos edificios*

1. O informe de avaliación do edificio, en diante IAE, é un instrumento que acredita a situación na que se atopa un edificio en relación co seu estado de conservación, co cumprimento da normativa vixente sobre accesibilidade e co seu grado de eficiencia enerxética.
2. Corresponde aos concellos velar polo cumprimento da obriga de redactar os IAE.





XUNTA DE GALICIA

Artigo 6. *Contido do informe de avaliación dos edificios*

1. O IAE identificará o edificio con expresión da súa referencia catastral e a súa identificación rexistral a través do Código Rexistral Único (CRU), ao que se refire o artigo 9 da Lei hipotecaria, e conterá, como mínimo, a seguinte información:

a) A avaliación do estado de conservación do edificio, que incluíra o seu estado xeral, o dos seus elementos estruturais, construtivos e o das instalacións que non requiran, pola súa normativa sectorial, inspeccións técnicas específicas, así como as patoloxías ou deficiencias que se poidan apreciar coa inspección visual. No caso das instalacións que requiran, de acordo coa súa normativa de aplicación, unha inspección técnica específica, o/a técnico/a que efectúe a avaliación do edificio limitarase a requirir ás persoas usuarias, propietarias ou administradoras a presentación dos correspondentes contratos de mantemento, boletíns, informes ou outros documentos que acrediten o cumprimento das esixencias propias de cada instalación.

b) A avaliación das condicións básicas de accesibilidade universal e non discriminación das persoas con discapacidade para o acceso e utilización do edificio, de acordo coa normativa vixente, para establecer se o edificio é susceptible ou non de realizar axustes razoables para satisfacelas.

c) A certificación da eficiencia enerxética do edificio, co contido e mediante o procedemento establecido pola normativa vixente.

d) En edificios catalogados e declarados bens de interese cultural, a avaliación do estado de conservación dos elementos merecentes de protección cultural de acordo coas determinacións do catálogo, a declaración do ben como de interese cultural ou as normas que determinen a súa protección.

e) A avaliación de calquera outras condicións básicas da edificación que se determinen regulamentariamente.

2. Regulamentariamente determinarase o contido detallado, estrutura, alcance e os efectos derivados dos IAE.



XUNTA DE GALICIA

Artigo 7. *Obrigatoriedade do informe de avaliación dos edificios*


1. Están obrigadas a dispoñer do IAE as persoas propietarias únicas de edificios, as comunidades de propietarios/as ou as agrupacións de comunidades de propietarios/as de edificios que se atopen nalgunha das seguintes situacións:

- a) Os edificios de uso residencial de vivenda colectiva cunha antigüidade de máis de 50 anos.
- b) O resto dos edificios, cando así o determine a normativa municipal que poderá establecer especialidades de aplicación do citado informe, en función da súa situación, antigüidade, tipoloxía ou uso predominante.

2. Se o edificio contase cunha inspección técnica de edificios (ITE) en vigor, poderán incorporarse os datos desta ao IAE sen necesidade de realizar unha nova inspección, sempre que o contido desta se axuste ao disposto no regulamento que o desenvolva.

3. O IAE deberá presentarse no concello no que está situado o inmovible e incorporarse ao libro do edificio.

4. O incumprimento do deber de presentar o IAE, en tempo e forma, terá a consideración de infracción urbanística co carácter e as consecuencias que atribúa a Lei 2/2016, do 10 de febreiro, do solo de Galicia.





XUNTA DE GALICIA

Artigo 8. *Vixencia e periodicidade do informe de avaliación dos edificios*

1. O IAE terá unha vixencia de 10 anos dende a data da súa elaboración podendo os concellos establecer unha menor, mediante ordenanza municipal.
2. No suposto previsto no apartado 2 do artigo anterior, a vixencia do IAE será de 10 anos transcorridos desde a data de elaboración da ITE.

A handwritten signature in black ink, appearing to be 'M. C.', written over a faint circular stamp.




XUNTA DE GALICIA

Artigo 9. *Capacitación para subscribir o informe de avaliación dos edificios*

1. O IAE deberá ser subscritopor persoal técnico facultativo competente. Para tal efecto considérase persoal técnico facultativo competente ao que estea en posesión de calquera das titulacións académicas e profesionais habilitantes para a redacción de proxectos ou dirección de obras e dirección de execución de obras de edificación, segundo o establecido na Lei 38/1999, do 5 de novembro, de ordenación da edificación, ou teña acreditada a cualificación necesaria para a realización do Informe, segundo as disposicións aplicables en materia de capacitación profesional. O dito persoal técnico, cando o estime necesario, poderá solicitar, en relación cos aspectos relativos á accesibilidade universal, o criterio experto das entidades e asociacións de persoas con discapacidade que contén cunha acreditada traxectoria e teñan entre os seus fins sociais a promoción da dita accesibilidade.

2. Cando se trate de edificios pertencentes ás administracións públicas poderán subscribir os IAE, de ser o caso, o persoal dos correspondentes servizos técnicos que, pola súa capacitación profesional, poidan asumir as mesmas funcións ás que se refire o apartado anterior.

3. As deficiencias que se observen en relación coa avaliación do disposto no artigo 6, xustificarse no Informe baixo o criterio e a responsabilidade do persoal técnico competente que o subscriba.





XUNTA DE GALICIA

Artigo 10. *Rexistro de Informes de Avaliación de Edifícios*

1. Para facilitar o cumprimento do deber de realizar o IAE esixido, a administración da comunidade autónoma creará un Rexistro de Informes de Avaliación de Edifícios, no que os concellos deberán rexistrar os informes que se lle presenten no seu termo municipal.
2. A consellería competente en materia de vivenda poñerá a disposición dos concellos unha aplicación informática na que rexistrar os ditos informes.

A handwritten signature in black ink, appearing to be a stylized name, possibly 'M. L. M.', written vertically on the left side of the page.



XUNTA DE GALICIA

TÍTULO I

Actuacións sobre o medio urbano

CAPÍTULO I

Disposicións xerais

Artigo 11. *A iniciativa na ordenación das actuacións no medio urbano*

1. A iniciativa para propoñer a ordenación das actuacións sobre o medio urbano, nos termos establecidos pola lexislación básica estatal, corresponderá:

- a) Ás administracións públicas.
- b) Ás entidades públicas adscritas ou dependentes delas.
- c) Ás persoas físicas e xurídicas propietarias e titulares de dereitos reais ou de aproveitamento.
- d) Ás comunidades e agrupacións de comunidades de persoas propietarias.
- e) Ás cooperativas de vivenda constituídas para o efecto.
- f) Ás empresas, entidades ou sociedades que interveñan en nome de calquera dos suxeitos citados as letras c), d) e e).

2. A dirección do proceso, tanto nos supostos de iniciativa pública como privada, correspóndelle aos entes públicos.



XUNTA DE GALICIA

Artigo 12. *Requisitos previos para a ordenación das actuacións no medio urbano.*

1. As actuacións sobre o medio urbano que precisen unha intervención pública requirirán que o concello ou, no seu caso, a Administración autonómica delimite o ámbito da actuación, mediante un acordo administrativo de identificación da actuación illada de rehabilitación ou de delimitación dun área de actuación conxunta, agás que a intervención da administración se limite á imposición de multas coercitivas ou ordes de execución subsidiaria.

Os ámbitos da actuación conxunta poderán ser continuos ou descontinuos.

No caso no que sexa preciso proceder ao reparto de cargas e beneficios, a identificación da actuación illada de rehabilitación ou da delimitación da área de actuación conxunta establecerá o sistema de xestión adoptado para o ámbito.

2. A delimitación do ámbito no que se poden realizar as actuacións sinaladas no apartado precedente pode corresponder:

a) Ao concello, en cuxo caso aplicárase, para os efectos previstos nesta lei, exclusivamente o réxime establecido neste título, ademais da súa lexislación específica.

b) Á Xunta de Galicia, en calquera das clases reguladas no título II, suposto no que lle será de aplicación o réxime previsto nesta lei.

3. As intervencións sobre o medio urbano que precisen a modificación da ordenación urbanística do ámbito requirirán a previa ou simultánea tramitación do novo instrumento de planeamento ou a modificación daquel.

O documento de planeamento poderá incluír a delimitación dos ámbitos de xestión de acordo coa normativa urbanística e contemplar, no seu caso, a identificación das actuacións illadas de rehabilitación ou dos ámbitos de xestión conxunta de rehabilitación edificatoria ou de rexeneración ou renovación urbanas.

Poderán identificarse actuacións illadas de rehabilitación ou delimitar ámbitos de actuación conxunta con posterioridade á aprobación do instrumento de planeamento que modifique a ordenación do ámbito.

4. O acordo administrativo mediante o que se delimiten os ámbitos de actuación conxunta ou



XUNTA DE GALICIA

se autoricen as actuacións que deban executarse de maneira illada garantirán, en todo caso, a realización das notificacións requiridas pola lexislación aplicable e o trámite de información ao público, cando este sexa preceptivo. O dito acordo conterà, ademais e como mínimo, os extremos seguintes:

a) Identificación dos inmobles incluídos no ámbito a delimitar e descrición das actuacións que é preciso executar.

b) Identificación dos inmobles incluídos no ámbito nos que as actuacións de rehabilitación edificatoria superen o límite do deber legal de conservación. O deber legal de conservación, que constituirá o límite das obras que se deban executar por conta das persoas propietarias cando a administración as ordene por motivos turísticos ou culturais, ou para a mellora da calidade ou sustentabilidade do medio urbano, establécese, de acordo coa lexislación estatal, na metade do valor actual de construción dun inmovible de nova planta, equivalente ao orixinal, en relación coas características construtivas e a superficie útil, realizado coas condicións necesarias para que a súa ocupación sexa autorizable ou, se fora o caso, quede en condicións de ser legalmente destinado ao uso que lle sexa propio. Cando se supere o dito límite, as obras que o excedan para obter melloras de interese xeral serán por conta dos fondos da administración que impuxo a súa realización.

c) Avance, no seu caso, da equidistribución que sexa precisa, entendendo por tal a distribución, entre todas as persoas afectadas, dos custos derivados da execución da correspondente actuación e dos beneficios imputables a esta, incluíndo entre eles as axudas públicas e todos os que permitan xerar algún tipo de ingreso vinculado á operación.

A equidistribución poderá afectar tanto a actuacións de transformación urbanística como a actuacións edificatorias.

A equidistribución tomará como base as cotas de participación que correspondan a cada unha das persoas propietarias na comunidade de propietarios/as ou na agrupación de comunidades de propietarios/as, nas cooperativas de vivendas que puidesen constituírse para o efecto, así como a participación que, se é o caso, corresponda, de conformidade co acordo ao que se chegase, ás empresas, entidades ou sociedades que vaian intervir na operación, para retribuír a súa actuación.

d) Deberá ter en conta a situación socioeconómica das persoas ocupantes das edificacións así



XUNTA DE GALICIA

como a das súas propietarias, para que se garantan os seus dereitos e se consideren solucións alternativas na xestión cando pola súa situación económica, idade ou outras circunstancias non poidan afrontar directamente os gastos da actuación.

e) O sistema de xestión deberá arbitrar mecanismos específicos para garantir a tutela real e efectiva da actuación por parte da administración, así como os dereitos das persoas ocupantes e propietarias das vivendas ou edificacións así como as determinacións do apartado d).

f) Sempre que sexa posible se deberá garantir a permanencia das persoas ocupantes nas vivendas durante a actuación, ou asegurar o dereito de realoxo e retorno, especialmente cando aquelas se atopen en situacións de vulnerabilidade económica ou social.





XUNTA DE GALICIA

Artigo 13. *Efectos da delimitación espacial dun ámbito de rehabilitación edificatoria, ou de rexeneración ou renovación urbanas.*

1. A delimitación espacial do ámbito de actuación, sexa conxunta ou illada, unha vez firme en vía administrativa, marca o inicio das actuacións a realizar, de conformidade coa forma de xestión pola que optase a administración actuante.

Esta delimitación habilita, de ser o caso, ao inicio do procedemento de equidistribución de beneficios e cargas entre as parcelas afectadas e comporta a declaración da utilidade pública ou, no seu caso, o interese social, para os efectos da aplicación dos réximes de expropiación, venda e substitución forzosas dos bens e dereitos necesarios para a súa execución a favor da administración actuante, ademais daqueles outros que expresamente se deriven do disposto na lexislación aplicable.

A dita declaración poderase estender aos terreos precisos para conectar a actuación de urbanización coas redes xerais de servizos, cando sexa necesario.

2. Será posible ocupar as superficies de espazos libres ou de dominio público que resulten indispensables para a instalación de ascensores ou outros elementos que garantan a accesibilidade universal, así como as superficies comúns de uso privativo, tales como vestíbulos, descansadoiros, sobrecubertas, beirís e soportais, tanto se se sitúan no solo, como no subsolo ou no voo, cando non resulte viable, técnica ou economicamente, ningunha outra solución e sempre que quede asegurada a funcionalidade dos espazos libres, dotacións e demais elementos do dominio público.

O acordo firme en vía administrativa a que se refire o apartado 1, ademais dos efectos previstos no artigo 42.3 do texto refundido da Lei de Solo e Rehabilitación Urbana, lexítima á ocupación das superficies de espazos libres ou de dominio público que sexan de titularidade municipal, sendo a aprobación definitiva causa suficiente para que se estableza unha cesión de uso do solo polo tempo en que se manteña a edificación ou, no seu caso, a súa recualificación e desafectación, con alleamento posterior á comunidade ou agrupación de comunidades de persoas propietarias correspondente. Cando fose preciso ocupar bens de dominio público pertencentes a outras administracións, os concellos poderán solicitarlle á persoa titular a cesión do seu uso ou desafectación, a cal procederá, no seu caso, de conformidade co previsto na lexislación reguladora do ben correspondente.



XUNTA DE GALICIA

3. O disposto no apartado anterior será tamén de aplicación aos espazos que se requiran para a realización de obras que consigan reducir, polo menos, nun 30 % a demanda enerxética anual de calefacción ou refrixeración do edificio e que consistan en:

a) A instalación de illamento térmico ou fachadas ventiladas polo exterior do edificio, ou o cerramento ou acristalamento das terrazas xa teitadas.

b) A instalación de dispositivos bioclimáticos apegados ás fachadas ou cubertas.

c) A realización das obras e a implantación das instalacións necesarias para a centralización ou dotación de instalacións enerxéticas comúns e de captadores solares ou outras fontes de enerxía renovables, nas fachadas ou cubertas, cando consigan reducir o consumo anual de enerxía primaria non renovable do edificio, polo menos, nun 30 %.

d) A realización de obras en zonas comúns ou vivendas que logren reducir, polo menos, nun 30 %, o consumo de auga no conxunto do edificio.

4. Nos edificios, de uso residencial, protexidos polo seu valor cultural (BIC e catalogados) nos que resulte necesaria a súa adaptación ás condicións mínimas de accesibilidade, habitabilidade ou eficiencia enerxética e esta entre en contradición coa normativa de protección do patrimonio cultural, poderán autorizarse solucións alternativas respecto a das esixencias técnicas nestas materias que resulten sostibles e respectuosas coas características e elementos de valor cultural do edificio que permitan a rehabilitación das vivendas e/ou dos edificios, de forma que prevaleza o uso residencial orixinal ou característico.

5. As actuacións derivadas das intervencións de rehabilitación dirixidas á mellora das condicións de accesibilidade e da eficiencia enerxética sinaladas nos apartados 2 e 3 deste artigo, non computarán para os efectos de edificabilidade, volume máximo edificable e ocupación de parcela; nin de distancias mínimas a lindeiros, outras edificacións, espazos públicos e vías públicas ou cumprimento das aliñacións, sempre que así o estableza o acordo de delimitación do ámbito.



XUNTA DE GALICIA

Artigo 14. *Actuacións de rehabilitación edificatoria nos Camiños de Santiago*

1. As actuacións de rehabilitación edificatoria nos ámbitos delimitados dos Camiños de Santiago deberán ser compatibles coa conservación e protección dos seus valores propios, e garantir as características principais do territorio afectado, mantendo os núcleos tradicionais e as actividades agropecuarias e forestais. En ningún caso as actuacións de rehabilitación suporán un perigo de destrución, deterioración ou menoscabo dos seus valores culturais.
2. Nos edificios localizados no territorio histórico dos Camiños de Santiago que non contén con protección cultural específica, será de aplicación o recollido na Sección Primeira do Capítulo V do Título I da presente lei.



CAPÍTULO II

A planificación das actuacións no medio urbano

Sección 1ª. Planificación e instrumentos para as actuacións no medio urbano

Artigo 15. *Planificación das actuacións no medio urbano*

1. As actuacións de rehabilitación edificatoria e as de rexeneración e renovación urbanas planificaranse mediante un plan xeral, un plan especial ou calquera outro dos instrumentos indicados nesta lei e na lexislación de ordenación do territorio, urbanismo e de protección do patrimonio cultural.

2. A planificación das actuacións dará prioridade ás actuacións de rehabilitación sobre as de substitución e dentro das primeiras, aquelas que permitan o mantemento da poboación residente no ámbito.

3. Cando os procesos de rehabilitación edificatoria e de rexeneración e renovación urbanas, supoñan o incremento das dotacións públicas ou cando as determinacións de protección do patrimonio cultural fagan inviable a materialización do aproveitamento ao que teñan dereito as persoas propietarias do solo ou das edificacións, poderá posibilitarse, de acordo co procedemento que se determine regulamentariamente, a transferencia do aproveitamento urbanístico a terreos do solo urbano non consolidado, con ordenación detallada aprobada, localizados fóra do ámbito delimitado para a actuación.

Excepcionalmente, a dita transferencia do aproveitamento urbanístico poderá establecerse a ámbitos de solo urbano consolidado nos que a administración dispoña de:

- a) aproveitamento obtido pola redución do dereito a propiedade do solo adquirido a través de actuacións de substitución ou venda forzosa ou de expropiación forzosa por incumprimento da función social da propiedade, ou
- b) terreos ou edificacións da súa titularidade.

4. Nos procesos de rehabilitación edificatoria e de rexeneración e renovación urbanas, nos terreos destinados a dotacións e equipamentos urbanísticos, o planeamento poderá establecer unha cualificación diferente para o subsolo, para permitir a implantación de usos privados con



XUNTA DE GALICIA


destino a prazas de aparcadoiro para cubrir as necesidades das vivendas integrantes dun ámbito sometido a unha actuación de rexeneración ou renovación urbana, sempre que se garanta a viabilidade do uso previsto sobre rasante, a calidade ambiental e a debida protección do espazo urbano, así como a compensación que, de ser o caso, corresponda á administración que deba recibir a dotación ou o equipamento.

5. Os plans especiais que teñan por obxecto actuacións de rehabilitación edificatoria e de rexeneración e renovación urbanas poden:

a) Excluir, xustificando a coherencia e compatibilidade cos valores culturais do conxunto histórico protexido, o criterio de mantemento da trama urbana, das aliñacións e das rasantes existentes nos conxuntos históricos.

b) Delimitar ámbitos que deban ser obxecto das actuacións sobre o medio urbano ás que se refire o artigo 12 ou modificar os que puideran vir recollidos no plan xeral.

6. Os plans especiais que afecten a ámbitos de protección patrimonial poderán modificar as determinacións e o ámbito definido no plan xeral para incluír nel os terreos ou edificacións destinadas a paliar o déficit de aparcadoiros, equipamentos ou dotacións, públicos ou privados, existentes no ámbito, sen suxeitarse aos trámites que para a alteración dos plan xerais prevé a lexislación do solo de Galicia.





Sección 2ª. Tramitación simplificada das modificacións dos instrumentos de planeamento no medio urbano

Artigo 16. Tramitación simplificada das modificacións dos instrumentos de planeamento para actuacións de rehabilitación edificatoria e de rexeneración e renovación urbanas

1. As modificacións puntuais non substanciais do plan xeral, dos plans especiais de reforma interior e dos plans especiais de protección que afecten a ámbitos do solo urbano para actuacións de rehabilitación edificatoria e de rexeneración e renovación urbanas, poderán tramitarse mediante un procedemento simplificado, sempre que non se aumente o aproveitamento lucrativo, seguindo as determinacións recollidas nos artigos seguintes.

Para estes efectos, considéranse modificacións puntuais non substanciais de plan aquelas de escasa entidade e de alcance reducido e local, que cumpran os seguintes requisitos:

- a) Que a superficie da modificación non supere os 10.000 metros cadrados.
- b) Que non afecten a unha superficie superior ao equivalente ao 1% do solo urbano do municipio. Nos municipios de menos de 5.000 habitantes esta porcentaxe será do 3 %.
- c) Que non modifique a clasificación do solo.

2. Consideraranse, así mesmo, modificacións puntuais non substanciais aquelas que, sen reunir as condicións indicadas no apartado 1, modifiquen exclusivamente as ordenanzas cun alcance reducido e de escasa entidade.

3. Non poderán considerarse modificacións puntuais non substanciais, aquelas que teñan unha incidencia negativa no medio ambiente, na mobilidade, nas infraestruturas ou no patrimonio cultural.



XUNTA DE GALICIA

Artigo 17. *Tramitación medioambiental*

1. A tramitación das modificacións puntuais indicadas no artigo anterior estará exenta da tramitación ambiental sempre que a dita modificación non constitúa unha variación fundamental da estratexia, directrices e propostas ou da cronoloxía do planeamento que se vai modificar, e que ademais non produza diferencias nos efectos previstos ou na súa zona de influencia.
2. Para garantir que non se producen diferencias nos efectos previstos ou na súa zona de influencia, se deberá solicitar informe ao órgano ambiental da comunidade autónoma, quen deberá pronunciarse, no prazo máximo dun mes, sobre a necesidade de tramitación de avaliación ambiental. No caso de que non se emita o informe no devandito prazo, considerarase que non é necesaria a tramitación ambiental.
3. En calquera caso, se para pronunciarse sobre os aspectos indicados no apartado 2, o órgano ambiental considera necesario solicitar algún informe sectorial aos organismos competentes, poderá acordar a ampliación do prazo anterior ata a recepción do informe indicado. A citada ampliación de prazo non poderá ser superior a un mes.



XUNTA DE GALICIA

Artigo 18. *Procedemento de tramitación das modificacións puntuais non substanciais de planeamento*

1. O procedemento das modificacións puntuais non substanciais dos plans tramitarase nos termos seguintes:

a) O procedemento iniciárase por proposta do concello, que aprobará inicialmente a modificación e a someterá a modificación á información pública polo prazo mínimo dun mes.

Simultaneamente, solicitaranse os informes sectoriais necesarios e trasladará a documentación ao órgano competente en materia de urbanismo, o cal solicitará os informes sectoriais autonómicos preceptivos, que deberán ser emitidos no prazo de un mes; transcorrido este, entenderanse emitidos con carácter favorable.

b) Á vista das alegacións presentadas e informes recibidos, o concello aprobará provisionalmente, no seu caso, a proposta de modificación e acordará a remisión do expediente completo á consellería competente en materia de urbanismo, quen emitirá o informe preceptivo e vinculante sobre a modificación proposta no prazo máximo dun mes.

c) Unha vez emitido o informe, será remitido ao concello para que, no seu caso, aprobe definitivamente a modificación.

2. No caso de que a modificación proposta non cumpra coas determinacións previstas no artigo 16 a persoa titular da dirección xeral competente en materia de urbanismo devolverá o expediente ao concello para a súa tramitación polo procedemento ordinario.



XUNTA DE GALICIA

CAPÍTULO III

A xestión das actuacións no medio urbano

Artigo 19. As formas de xestión

1. A xestión das actuacións no medio urbano que impliquen transformación urbanística executaranse a través de calquera dos sistemas de actuación previstos na Lei do solo de Galicia.
2. A execución das actuacións no medio urbano que non impliquen transformación urbanística e requiran equidistribución de beneficios e cargas poderá realizarse a través dos réximes de expropiación, venda e substitución forzosas reguladas nesta lei así como das modalidades de xestión, directa ou indirecta, que se determinen regulamentariamente.





XUNTA DE GALICIA

Artigo 20. *Normas específicas de xestión da rehabilitación edificatoria en solo urbano consolidado*

1. As actuacións de rehabilitación edificatoria ordenadas pola administración, cando superen o límite do deber legal de conservación, realizaranse por convenio coas persoas titulares afectadas e, no seu defecto, por aplicación do réxime de venda ou substitución forzosas ou por expropiación forzosa.

2. Nos casos sinalados no apartado anterior, nos supostos de venda ou substitución forzosas ou de expropiación forzosa nos ámbitos delimitados como áreas de rexeneración urbana de interese autonómico o contido do dereito de propiedade do solo minorarase nun 50% do seu valor, correspondendo a diferenza á administración actuante.

Nestes casos, a administración actuante, con base en criterios motivados de dinámica económica, de falta de demanda de vivenda ou calquera outra que fundamenten a dificultade da execución das actuacións ordenadas no ámbito, poderá rebaixar a porcentaxe de minoración do valor do solo sinalada anteriormente.

Esta minoración non será de aplicación a aquelas persoas propietarias que acrediten que pola súa situación económica, idade ou outras circunstancias non poidan afrontar directamente os custos da actuación.

3. No caso de que existan persoas propietarias que estiveran de acordo coa administración para a formalización do pertinente convenio voluntario de xestión, a administración actuante poderá optar entre a formalización do convenio ou a aplicación do réxime de venda ou substitución forzosas ou de expropiación forzosa. Neste caso a minoración sinalada no apartado anterior, só se aplicará ás persoas propietarias desconformes.

4. En todo caso, cando as persoas propietarias do edificio, así o acorden por unanimidade, poderán executar por si mesmas a actuación, aínda que o importe das obras supere o límite do deber legal de conservación.



XUNTA DE GALICIA

Artigo 21. *Normas específicas de xestión da rexeneración e renovación urbanas en solo urbano consolidado*

No suposto de que a actuación de rexeneración e renovación urbana comprenda a rehabilitación de edificios, aínda que o seu importe exceda do límite do deber legal de conservación, as persoas propietarias da edificación, cando así o acorden por unanimidade, terán dereito a executar a rehabilitación do edificio por si mesmas, sempre que asuman a porcentaxe dos custos das obras complementarias de urbanización que lles corresponda. En todo caso será condición indispensable que a devandita rehabilitación por parte das persoas propietarias non constitúa un obstáculo para o desenvolvemento da unidade de rexeneración e renovación urbana correspondente.



XUNTA DE GALICIA

Artigo 22. Normas específicas de xestión da rexeneración e renovación urbanas en solo urbano non consolidado

A execución das actuacións de rexeneración e renovación urbanas sobre o solo urbano, en ámbitos de solo urbano non consolidado, realizarase por polígonos completos.



XUNTA DE GALICIA

Artigo 23. Pago en especie dos prezos xustos expropiatorios

1. O pagamento do prezo xusto expropiatorio, se hai acordo coa persoa propietaria, poderá satisfacerse en especie. Non obstante, cando se aplique a expropiación na xestión das actuacións sobre o medio urbano, non será preciso o consentimento da persoa propietaria para pagar o prezo xusto expropiatorio en especie, sempre que o mesmo se efectúe dentro do propio ámbito de xestión e dentro do prazo temporal establecido para a terminación das obras correspondentes.

2. A liberación da expropiación non terá carácter excepcional e poderá ser acordada discrecionalmente pola administración actuante. A persoa liberada deberá achegar garantías suficientes en relación co cumprimento das obrigas que lle correspondan.





XUNTA DE GALICIA

CAPÍTULO IV

Obrigas relativas á edificación, conservación e rehabilitación

Sección 1ª. Disposicións xerais

Artigo 24. Obrigas relativas á edificación, conservación e rehabilitación

1. As persoas propietarias das edificacións están obrigadas a realizar as obras de edificación, conservación e de rehabilitación nos prazos e condicións previstas nas leis, especialmente naquelas que contemplan os dereitos das persoas con discapacidade e a súa inclusión social; nos instrumentos de planeamento e, no seu caso, nos instrumentos de xestión e ordes de execución que os recollan.

2. O incumprimento das obrigas establecidas no apartado anterior facultará á administración para a adopción, a súa elección e logo da audiencia ás persoas obrigadas, de calquera das seguintes medidas:

- a) Execución forzosa
- b) Expropiación forzosa
- c) Venda forzosa
- d) Substitución forzosa.

3. Para a aplicación das medidas previstas nos apartados b) a d), será requisito previo a declaración polo concello, de oficio ou por solicitude da persoa interesada, do incumprimento de que se trate por resolución expresa que así o acredite.



XUNTA DE GALICIA

Artigo 25. Redución do contido do dereito da propiedade do solo

1. Nos supostos de expropiación, venda ou substitución forzosas previstos neste capítulo, o contido do dereito de propiedade do solo nunca poderá ser minorado nunha porcentaxe superior ao 50 % do seu valor, correspondendo a diferenza á administración actuante.
2. Non será de aplicación a redución prevista no apartado anterior ás persoas propietarias das edificacións que non poidan facer fronte ao pago das actuacións de edificación, conservación e rehabilitación por caer en risco de exclusión social debido ás súas limitacións socioeconómicas.

A handwritten signature in black ink, appearing to be a stylized name, located on the left side of the page.



XUNTA DE GALICIA

Artigo 26. *Procedemento para a declaración de incumprimento das obrigas relativas á edificación, conservación e rehabilitación*

1. O procedemento para a declaración de incumprimento das obrigas relativas á edificación, conservación e rehabilitación poderá iniciarse de oficio ou por solicitude de persoa interesada.
2. No acordo de incoación da declaración de incumprimento incluírase o sistema de actuación elixido pola administración, no caso de que o procedemento se resolva coa estimación de concorrencia de incumprimento.
3. Iniciado o procedemento para a declaración de incumprimento, solicitarase do Rexistro da Propiedade a certificación de dominio e cargas dos terreos correspondentes, debendo facerse constar por nota marxinal o inicio do procedemento para a declaración de incumprimento. A duración da nota marxinal será a prevista na lexislación hipotecaria ou urbanística aplicable.
4. O órgano municipal competente acordará a apertura dun trámite de audiencia de quince días ás persoas propietarias e demais titulares de dereitos reais afectados que consten no Rexistro da Propiedade e/ou no Catastro. Así mesmo, de maneira simultánea a este trámite, o concello, se así o considera oportuno, poderá acordar a apertura dun trámite de información pública por un prazo de vinte días. O anuncio de información pública farase no *Diario Oficial de Galicia* e na sede electrónica do concello.
5. Concluídos os prazos de audiencia e, de ser o caso, de información pública, o concello, previos os informes oportunos, deberá dictar resolución sobre a declaración de incumprimento e notificala no prazo máximo de tres meses.
6. O procedemento poderá terminarse, sen a adopción dalgunha outra medida, no suposto de que a persoa propietaria solicitase licenza para a realización das obras de edificación, conservación ou rehabilitación, con anterioridade á declaración de incumprimento.



XUNTA DE GALICIA

Artigo 27. Requisitos da resolución de declaración do incumprimento

A resolución da declaración do incumprimento, que poñerá fin á vía administrativa, haberá de cumprir os seguintes requisitos:

- a) Deberá ser comunicada, mediante certificación administrativa, ao Rexistro da Propiedade para a práctica de nota marxinal á inscrición do correspondente inmovible.
- b) Incorporará unha valoración dos terreos, das edificacións ou, no seu caso, doutros bens afectados, conforme á normativa estatal do solo e valoracións.
- c) Declarará, segundo proceda, a aplicación da execución subsidiaria, a expropiación forzosa por incumprimento da función social da propiedade, a venda forzosa ou a substitución forzosa.
- d) Advertirá expresamente se habilita ou non para que o concello inste a declaración do inmovible en estado de abandono prevista no capítulo III do título IV.




XUNTA DE GALICIA

Sección 2ª. Da execución forzosa e os seus medios

Artigo 28. Medios de execución forzosa

A execución forzosa polas administracións públicas, no caso do incumprimento das obrigas previstas nesta lei, efectuarase, respectando sempre o principio de proporcionalidade, polos seguintes medios:

- a) Multas coercitivas
- b) Constrinximento sobre o patrimonio
- c) Execución subsidiaria.





XUNTA DE GALICIA


Sección 3ª. Ordes de execución

Artigo 29. Ordes de execución

1. Os concellos, de oficio ou por solicitude de persoa interesada, mediante o correspondente procedemento e logo da audiencia das persoas interesadas, poderán ditar ordes de execución que obriguen ás persoas propietarias de bens inmobles a realizar as actuacións necesarias ata o límite do deber legal de conservación nos termos establecidos na lexislación urbanística de Galicia.

2. As ordes de execución poderán, así mesmo, determinar as consecuencias do seu incumprimento, tanto a través da imposición de multas coercitivas, como da aplicación da execución subsidiaria, a expropiación forzosa por incumprimento da función social da propiedade, a venda forzosa ou a substitución forzosa, tendo nestes últimos supostos, a consideración e os mesmos efectos da declaración de incumprimento, sen que sexa necesario proceder a tramitar a dita declaración.

3. O concello deberá advertir expresamente se o incumprimento desta orde o habilita ou non para instar a declaración do inmueble en estado de abandono prevista no capítulo III do título





XUNTA DE GALICIA

Artigo 30. *Incumprimento das ordes de execución*

1. No caso do incumprimento da orde de execución, a Administración municipal poderá proceder á execución forzosa mediante a imposición de multas coercitivas de 1.000 a 10.000 euros, reiterables trimestralmente, sen que en ningún caso poidan superar individualmente ou no seu conxunto o 75 % do custo de reposición da edificación ou dunha nova construción con características similares, excluído o valor do solo.
2. A Administración municipal tamén poderá acudir, en calquera momento, á execución subsidiaria realizando as actuacións previstas nas citadas ordes por conta da persoa obrigada. O importe dos gastos, danos e prexuízos poderá liquidarse de forma provisional, antes da execución, a conta da liquidación definitiva.



XUNTA DE GALICIA

Sección 4ª. Constrinximento sobre o patrimonio

Artigo 31. Constrinximento sobre o patrimonio

Se como consecuencia da tramitación dun expediente de incumprimento derivase unha débeda líquida, vencida e exixible, seguirase o previsto nas normas reguladoras do procedemento de constrinximento.

A handwritten signature in black ink, appearing to be a stylized name, possibly 'M. N.', written vertically on the left side of the page.



XUNTA DE GALICIA

Sección 5ª. Da expropiación forzosa

Artigo 32. Expropiación forzosa por incumplimento das obrigas relativas á edificación, conservación e rehabilitación

A declaración do incumplimento habilita á administración para exercer a expropiación de conformidade coa normativa básica estatal, sendo de aplicación o pagamento en especie previsto no capítulo anterior.


A handwritten signature in black ink, consisting of several loops and a long horizontal stroke at the top.



XUNTA DE GALICIA

Artigo 33. *Expropiación en materia de accesibilidade*

A expropiación polo incumprimento da normativa en materia de accesibilidade rexerase polo disposto na Lei 8/2012, do 29 de xuño, de vivenda de Galicia.





XUNTA DE GALICIA

Sección 6ª. Da venda e substitución forzosas

Artigo 34. Réxime de venda ou substitución forzosas

1. A venda forzosa e a substitución forzosa teñen por obxecto garantir o cumprimento do deber de edificación, conservación e rehabilitación, mediante a imposición do seu exercicio, a través dun procedemento que garanta o cumprimento dos principios de publicidade e concorrencia.
2. Enténdese por venda forzosa a potestade pública que faculta á administración para proceder á venda dun inmovible a través dun procedemento de poxa pública co obxecto de garantir a súa rehabilitación ou conservación.
3. Enténdese por substitución forzosa a potestade pública que faculta á administración para substituír á persoa titular dun inmovible por outra persoa seleccionada a través dun procedemento con publicidade e concorrencia, para que realice as actuacións de edificación, conservación ou rehabilitación, podendo realizarse en réxime de propiedade horizontal coa persoa propietaria actual do solo.
4. Cando a administración actuante asuma o importe das cantidades imputables a aquelas persoas propietarias de vivendas que non poidan facer fronte ao seu pago por caer en risco de exclusión social, subscribirase un convenio entre a administración actuante e a persoa propietaria, no que quedará reflectida a fórmula de devolución das cantidades asumidas no proceso de substitución e o tipo de xuro aplicable ás cantidades aprazadas, non sendo de aplicación a minoración do dereito da propiedade previsto neste capítulo.



XUNTA DE GALICIA

Artigo 35. *Procedemento da venda ou substitución forzosas*

1. A resolución da declaración de incumprimento determinará, no seu caso, a aplicación da venda ou substitución forzosas.

2. Cando o procedemento determine a adxudicación por aplicación da venda ou substitución forzosas, unha vez resolto, a administración actuante expedirá unha certificación da devandita adxudicación, que será título inscribible no Rexistro da Propiedade, na que se farán constar as condicións e prazos aos que quede obrigada a persoa adquirinte, en calidade de resolutorias da adquisición.


A handwritten signature in black ink, appearing to be a stylized name, located on the left side of the page.



XUNTA DE GALICIA

Artigo 36. *Venda forzosa*

1. O concello, no prazo máximo de 6 meses desde a declaración de incumprimento, sacará os inmobles ou terreos a poxa pública. O tipo de licitación será o que resulte da valoración do inmoble. O prezo obtido entregarase á persoa propietaria, unha vez deducidos os gastos ocasionados e, de ser o caso, o importe correspondente á redución do dereito da propiedade previsto no artigo 25 e, no seu caso, as sancións aplicables.
2. Se a poxa se declarase deserta, convocarase de novo no prazo de tres meses, cunha rebaixa do 25 % sobre o tipo de licitación inicial. Se tamén esta quedase deserta, convocarase unha nova poxa, no prazo de tres meses, cunha rebaixa do 50% sobre o tipo de licitación inicial.
3. Se esta última poxa tamén quedase deserta, o concello, no prazo de seis meses, poderá adquirila para o patrimonio público de solo, ao 50% do tipo de licitación inicial.
4. Transcorridos os anteriores prazos sen que se producira a venda, quedará sen efecto o procedemento de venda forzosa, debendo notificarse ao Rexistro da Propiedade para a cancelación da nota marxinal estendida.





XUNTA DE GALICIA

Artigo 37. Obrigas da persoa adquirente

A persoa adquirente de inmobles polo procedemento sinalado nos apartados 1 e 2 do artigo anterior quedará obrigada a iniciar as obras no prazo de nove meses a partir da toma de posesión do predio e a edificalo no prazo fixado na licenza.

A handwritten signature in black ink, consisting of a horizontal line followed by a vertical line and several loops.



XUNTA DE GALICIA

Artigo 38. Substitución forzosa

No caso de substitución forzosa, as bases do procedemento de adxudicación determinarán os criterios aplicables para a súa adxudicación, as penalizacións e indemnizacións ás que houbera lugar en caso de incumprimento, a orde de puntuación que determinará, de ser o caso, a posterior adxudicación e a porcentaxe mínima de teito edificado a atribuír á persoa ou persoas propietarias do inmovible obxecto da substitución forzosa.

A handwritten signature in black ink, consisting of a horizontal line at the top, followed by a vertical line that curves to the right at the top, and a large, stylized 'N' shape below.



XUNTA DE GALICIA

Artigo 39. Obrigas da persoa adxudicataria da substitución forzosa

A persoa que resultase adxudicataria no procedemento de substitución forzosa deberá cumprir as súas obrigas nos prazos e termos establecidos nas bases do procedemento e na resolución de adxudicación. No caso de incumprimentos que deran lugar á resolución da adxudicación, realizarase unha nova adxudicación a favor dos/as seguintes licitadores/as de acordo coa orde de puntuación acadada.

A circular stamp with a signature inside, and a long vertical signature below it.



XUNTA DE GALICIA

CAPÍTULO V

As intervencións nos edificios incluídos no ámbito territorial das categorías de bens definidos na lei de Patrimonio Cultural de Galicia e ámbitos obxecto de planeamento especial de protección

Sección 1ª. Normas de aplicación directa

Artigo 40. Ámbitos afectados

1. As determinacións previstas nesta sección serán de aplicación aos edificios incluídos no ámbito territorial das categorías de bens definidos na lei de Patrimonio Cultural de Galicia, ou dos seus contornos de protección e zonas de amortecemento, así como a aqueles outros edificios incluídos en ámbitos sobre os que exista a obriga legal de redactar un plan especial de protección do patrimonio cultural, estea ou non aprobado. Porén, non serán de aplicación aos inmobles individualmente declarados bens de interese cultural nin aos catalogados que teñan un nivel de protección integral.

2. Estas determinacións prevalecerán sobre o que establezan os plans xerais de ordenación municipal, o Plan Básico Autonómico, o planeamento de desenvolvemento e os catálogos aprobados con anterioridade á entrada en vigor da presente lei e serán incorporados nos que se aproben con posterioridade. En todo caso, os plans especiais de protección que se tramiten con posterioridade á entrada en vigor desta lei, con carácter excepcional, poderán excluír da aplicación dalgunha destas normas as actuacións sobre determinados inmobles, parcelas ou rúas, sempre que se xustifique detalladamente a súa necesidade por motivos específicos de protección do patrimonio cultural.

3. En tanto os concellos non teñan aprobado un catálogo de protección adaptado ás determinacións da Lei 5/2016, do 4 de maio, dos bens situados no ámbito, será de aplicación o previsto na disposición transitoria primeira.




XUNTA DE GALICIA

Artigo 41. *Edificios con nivel de protección ambiental ou nivel de protección asimilable*

1. Nos edificios con nivel de protección ambiental ou con outro nivel de protección asimilable, estará permitida calquera actuación no interior sempre que se respecten:

- a) A imaxe exterior do edificio.
- b) A posición dos forxados. Non será preciso respectar esta condición cando a altura libre entre forxados da edificación sexa inferior a 2,40 m.
- c) A estrutura do parcelario orixinal.

2. Así mesmo, estarán permitidas as demolicións e reforma da fachada e dos elementos visibles dende a vía pública, cando o proxecto que contemple as actuacións supoña unha axeitada restauración, unha fiel reconstrución ou planee unha remodelación ou construción alternativa cun deseño que respecte o carácter do inmovible e do contorno protexido e sempre que non afecte a fachadas ou elementos singulares especificamente protexidos pola ficha do catálogo ou do documento de catalogación do ben.





XUNTA DE GALICIA

Artigo 42. Edificios con nivel de protección estrutural ou nivel de protección asimilable

1. Nos edificios con nivel de protección estrutural ou con outro nivel de protección asimilable, cando esta non afecte aos elementos ou características singulares do edificio que deben ser conservados ou repostos e non entren en contradición con eles, estarán permitidas as mesmas actuacións que nos edificios con nivel de protección ambiental sinaladas no artigo anterior.
2. Nos edificios con protección estrutural ou con outro nivel de protección asimilable, permitiranse os baleirados parciais que non afecten aos elementos que xustificaron a necesidade de protección estrutural. Cando estes elementos sexan exclusivamente elementos de fachada permitiranse baleirados totais da edificación.



XUNTA DE GALICIA

Artigo 43. Parcelario

1. Nos edificios con nivel de protección ambiental ou estrutural ou con outros niveis de protección asimilable, respectando os elementos, materiais e características da edificación singularmente protexidos, e sempre que se manteña a referencia á estrutura parcelaria orixinal, permitirase:

a) A utilización conxunta dos portais e dos núcleos de comunicación vertical de xeito que poidan servir a un máximo de tres edificios.

b) A regularización de parcelas cando a súa configuración actual sexa o resultado dunha distorsión da tipoloxía do parcelario do ámbito.

c) Agregar parcelas cando un dos edificios teña unha superficie ou configuración que fagan inviable resolver axeitadamente os seguintes parámetros:

1º. A accesibilidade universal ás vivendas.

2º. O cumprimento das condicións das normas de habitabilidade de vivendas de Galicia.

3º. A posibilidade de que a vivenda teña un mínimo de tres estancias destinadas a salón e dous dormitorios.

4º. O cumprimento dos estándares establecidos no Código Técnico da Edificación, admitíndose solucións alternativas que garantan os mesmos niveis de prestacións.

d) Permitir unir locais de negocio en plantas baixas de varias edificacións, mantendo a lectura da estrutura parcelaria do ámbito.

e) Permitir a redacción de proxectos que afecten a varios edificios que poidan agrupar, como espazos comúns do conxunto da promoción, as superficies non ocupadas polas edificacións. Nestes casos, permitirase a ocupación dos patios de ruego, sen computar edificabilidade, para garantir a accesibilidade de varios inmobles ou parcelas a través dun único ascensor accesible, sempre que a actuación non afecte aos elementos dos inmobles ou á súas características que estean especificamente protexidas nin comprometa a habitabilidade das vivendas.



XUNTA DE GALICIA

Sección 2ª. Licenzas directas

Artigo 44. Licenzas directas

1. As actuacións que non afecten á envolvente exterior dos edificios incluídos no ámbito dos bens de carácter territorial das categorías definidas na Lei do Patrimonio Cultural de Galicia ou no contorno de protección ou na zona de amortecemento de inmobles singulares declarados ben de interese cultural ou catalogados, exista ou non plan especial de protección ou con independencia do disposto neste, poderán ser obxecto de licenza directa por parte do concello sen necesidade de autorización da consellería competente en materia de protección do patrimonio cultural, sempre que non afecten a inmobles especificamente protexidos polo seu valor cultural e sen prexuízo, no seu caso, do cumprimento das esixencias que se poidan derivar da protección arqueolóxica ao que poida estar afecto.

2. Non obstante o sinalado no apartado anterior, poderán ser obxecto de licenza directa por parte do concello, sen necesidade de autorización da consellería competente en materia de protección do patrimonio cultural, as intervencións sobre bens catalogados con protección ambiental ou estrutural ou nivel de protección asimilable consistentes en actuacións no interior, nas carpinterías exteriores, acabados de fachada ou cambios de cuberta sempre que non afecten aos seus valores culturais nin aos seus elementos especificamente protexidos.

3. Tampouco precisarán da autorización previa da consellería competente en materia de protección do patrimonio cultural e, polo tanto, poderán ser obxecto de licenza directa por parte do concello as actuacións puntuais de mantemento ou uso ordinario, de moi escasa entidade técnica e construtiva, xustificadas pola deterioración material dos elementos sobre os que se propón a intervención, cun alcance moi concreto e parcial e que requiran dunha rápida execución pola ameaza que pode supoñer para a súa conservación ou apreciación, sempre que as actuacións manteñan ou respecten os materiais e sistemas construtivos orixinais.



XUNTA DE GALICIA

Sección 3ª. Plans especiais de protección

Artigo 45. Modelo de plan especial de protección

1. Regulamentariamente aprobarase un modelo de plan especial de protección que deberá servir de guía para a redacción dos plans especiais de protección.
2. O modelo de plan especial de protección conterá as determinacións básicas que se deberán incluír nos plans especiais que se redacten así como as normas de elaboración e redacción dos plans, de xeito que se unifiquen para todo o territorio de Galicia os criterios relativos a:
 - a) As definicións e terminoloxía a empregar.
 - b) As determinacións para establecer os niveis de protección dos bens afectados.
 - c) As ordenanzas e normativa básica a aplicar segundo os distintos niveis de protección
 - e) Un anexo de adaptación da normativa de habitabilidade que estableza o limiar mínimo de habitabilidade que deberán acadar as vivendas obxecto de actuacións de remodelación, rehabilitación, ou reconstrución das edificacións existentes.
 - d) A documentación a incluír e o modo en que dita documentación deberá ser presentada.



XUNTA DE GALICIA

TÍTULO II

Áreas de intervención no medio urbano declaradas pola Administración autonómica

CAPÍTULO I

Áreas de intervención no medio urbano declaradas pola Administración autonómica

Artigo 46. Concepto, declaración e contido.

1. Enténdese por área de intervención no medio urbano declarada pola Administración autonómica, o conxunto edificatorio urbano ou rural, continuo ou discontinuo, que debe ser sometido a unha intervención pública na que se atenda á rehabilitación ou substitución dos edificios e á calidade ambiental e urbanística do ámbito.
2. A declaración destas áreas corresponderá á Administración autonómica por solicitude do concello correspondente.
3. A intervención nestas áreas poderá comprender actuacións de renovación e mellora da urbanización, dos espazos públicos e demais dotacións urbanísticas ou das infraestruturas e servizos urbanos, así como articular medidas sociais, ambientais e económicas que estean enmarcadas nunha estratexia administrativa global, integrada e unitaria.




XUNTA DE GALICIA

Artigo 47. Clases de áreas de intervención no medio urbano declaradas pola Administración autonómica

As áreas de intervención no medio urbano declaradas pola Administración autonómica, en función do ámbito de actuación e das características do mesmo, poderán ser:

1. Área de Rehabilitación Integral (ARI)
2. Área de Rexeneración Urbana de interese autonómico (Rexurbe), que poderá incluír no seu ámbito unha Zona de Especial Necesidade de Rehabilitación (ZER).





XUNTA DE GALICIA

Artigo 48. Efectos da declaración dun área de intervención no medio urbano declarada pola Administración autonómica

A declaración pola Administración autonómica dunha área de intervención no medio urbano posibilita ademais da aplicación das medidas previstas nesta lei, o acceso ao financiamento dos plans e programas de axudas autonómicas ou estatais sempre que se cumpran os demais requisitos esixidos en cada plan ou programa ou mediante a sinatura de acordos específicos de financiamento que poderán referirse a todo o ámbito declarado ou a unha parte del.



XUNTA DE GALICIA

CAPÍTULO II

Áreas de Rehabilitación Integral

Sección 1ª. Disposicións xerais

Artigo 49. *Áreas de Rehabilitación Integral*

1. As áreas de rehabilitación integral (en diante ARI) son ámbitos de actuación conxunta que se declararán por resolución da Presidencia do Instituto Galego da Vivenda e Solo, por solicitude dos concellos interesados.
2. Estas áreas poderán afectar a ámbitos clasificados como solo urbano ou de núcleo rural que se atopen en estado de deterioración e posibilitarán o acceso ao financiamento previsto nesta lei e na normativa de desenvolvemento, para a realización conxunta de obras de rehabilitación en edificios e vivendas, incluídas as unifamiliares, de urbanización e reurbanización de espazos públicos e, no seu caso, de edificación de edificios ou vivendas en substitución doutros demolidos.



XUNTA DE GALICIA

Artigo 50. *Clases de áreas de rehabilitación integral*

1. As ARI clasifícanse nas seguintes categorías:

a) ARI de conxuntos históricos, cando o seu ámbito comprenda un conxunto histórico que teña declaración de ben de interese cultural ou estea integrado como tal no catálogo do patrimonio cultural de Galicia e que contén cun plan especial de protección. Neste suposto, o ámbito delimitado deberá ter como mínimo 50 vivendas.

b) ARI rurais, cando o seu ámbito pertenza a concellos con menos de 5.000 habitantes e a súa configuración sexa predominantemente rural. Neste suposto, o ámbito delimitado deberá ter como mínimo 20 vivendas.

c) ARI de ámbitos urbanos, cando o seu ámbito non pertenza a ningunha das categorías consideradas nos apartados anteriores. Neste suposto, o ámbito delimitado deberá ter como mínimo 50 vivendas.

2. Por resolución da Presidencia do IGVS, poderán modificarse os límites mínimos de vivendas de cada clase, sempre que as características do ámbito así o xustifiquen pola tipoloxía das súas edificacións, o interese arquitectónico específico do conxunto, o grado de deterioración das edificacións unido a baixos niveis de renda das persoas titulares das vivendas ou á extensión do ámbito catalogado polo planeamento.

3. No suposto de que se pretenda declarar unha área de rehabilitación integral para acollerse ao financiamento estatal dos plans de vivenda, deberán cumprirse os límites mínimos de vivendas e demais requisitos establecidos na correspondente normativa reguladora do plan.



XUNTA DE GALICIA

Artigo 51. *Xestión das áreas de rehabilitación integral*

1. As ARI xestionaranse a través do concello no que se atopen e baixo as directrices do IGVS en canto ás actuacións subvencionables, os procedementos de cualificación da actuación de rehabilitación e, no seu caso, de concesión de axudas que sexan da competencia do referido instituto.

2. No caso de que se acollan ao financiamento estatal a través dos plans de vivenda, deberán seguirse ademais, as directrices que fixe a normativa reguladora do plan correspondente.





XUNTA DE GALICIA

Sección 2ª. Áreas de rehabilitación integral supramunicipal

Artigo 52. Áreas de rehabilitación integral supramunicipal

A Presidencia do IGVS poderá declarar área de rehabilitación integral, de oficio ou por solicitude dos concellos, un ámbito que afecte a diferentes municipios que respondan a criterios de proximidade xeográfica, características arquitectónicas e problemática similares, sempre que exista un nexo de unión entre os devanditos ámbitos xa sexa de carácter histórico, xeográfico, cultural ou ambiental, que motive que deba ser tratado como un conxunto.




XUNTA DE GALICIA

Artigo 53. *Xestión das áreas de rehabilitación integral supramunicipais*

1. A xestión das ARI supramunicipais corresponderá directamente ao IGVS por si mesmo ou a través de encomenda a unha entidade do sector público autonómico que teña a consideración de medio propio.

2. O IGVS poderá convir coas deputacións provinciais, con entidades locais de carácter supramunicipal, ou ben coas entidades locais afectadas pola área de rehabilitación e rexeneración declarada, a dotación e coordinación dos recursos necesarios para a información, xestión e asesoramento, nas condicións de financiamento que no seu caso se determinen mediante o oportuno convenio de colaboración.





XUNTA DE GALICIA

CAPÍTULO III

Áreas de rexeneración urbana de interese autonómico (Rexurbe)

Sección 1ª: Delimitación e declaración das áreas de rexeneración urbana de interese autonómico (Rexurbe)

Artigo 54. Delimitación das áreas de rexeneración urbana de interese autonómico (Rexurbe)

1. A Comunidade Autónoma de Galicia por solicitude do concello correspondente, poderá declarar área de rexeneración urbana de interese autonómico (Rexurbe) aqueles ámbitos coa consideración de conxuntos históricos con declaración de ben de interese cultural (BIC), que se atopen na seguinte situación:

a) Un proceso de degradación arquitectónica, urbanística ou ambiental motivada, entre outros factores, pola obsolescencia do parque edificado, inadecuación ás necesidades poboacionais, déficits notorios e xeneralizados na calidade das vivendas, equipamentos, dotacións e servizos públicos do ámbito, degradación ambiental da zona e falta de conservación de bens e conxuntos edificatorios suxeitos a calquera réxime de protección do patrimonio cultural.

b) Situacións demográficas delicadas, derivadas dunha perda substancial ou envellecemento xeneralizado da poboación, ou por un crecemento excesivo non asumible urbanisticamente.

c) Existencia de graves problemas económicos e sociais, desaceleración constante da taxa de actividade económica e porcentaxes significativas de poboación que perciba pensións asistenciais ou non contributivas ou en risco de exclusión social.

2. O ámbito territorial de actuación poderá ser continuo ou descontinuo. En todo caso, o ámbito incluírá un mínimo de 50 inmobles con necesidades de intervención.


3. Sen prexuízo do sinalado nos apartados anteriores, poderá ser declarada área Rexurbe unha zona concreta especificamente delimitada e continua, comprendida nun BIC e incluída previamente nunha ARI, cando unicamente nesta zona concorran as circunstancias sinaladas no apartado 1, e as súas dimensións espaciais e económicas sexan especialmente significativas en relación co conxunto, mantendo o resto do ámbito a súa declaración orixinaria.

4. Excepcional e motivadamente, poderanse declarar áreas Rexurbe outros ámbitos urbanos,



XUNTA DE GALICIA

que sen ter a consideración de BIC, se atopen especialmente obsoletos e degradados nas condicións sinaladas no apartado 1, e que polas súas características, especial incidencia no ámbito urbano e necesidade urxente de actuación, así sexa acordado polo Consello da Xunta de Galicia.





XUNTA DE GALICIA

Artigo 55. Declaración das áreas Rexurbe

1. A solicitude de declaración dun área Rexurbe presentarase por parte do concello ante o IGVS cunha proposta que delimitará o ámbito e comprenderá, de xeito detallado, a estratexia social, económica, urbanística e arquitectónica que se pretende levar a cabo, para conseguir a efectiva recuperación e dinamización do ámbito.
2. O Consello da Xunta de Galicia, por proposta da consellería con competencias en materia de vivenda e logo dos informes sectoriais oportunos acordará, no seu caso, a declaración do ámbito como área Rexurbe.
3. Esta declaración permitirá que dentro do ámbito da área se poida optar ás medidas e aos instrumentos de financiamento previstos nesta lei e na normativa de desenvolvemento especificamente para as áreas Rexurbe.



XUNTA DE GALICIA

Sección 2ª: Zonas de especial necesidade de rehabilitación

Artigo 56. Declaracións de zona de especial necesidade de rehabilitación nas áreas Rexurbe


1. Dentro dunha área Rexurbe o IGVS poderá declarar, de oficio ou por solicitude do concello, zona de especial necesidade de rehabilitación (en adiante, ZER) a edificios específicos ou conxuntos deles, cando sexa preciso realizar unha intervención urxente debido ao seu estado de deterioración, a súa especial incidencia para a recuperación do ámbito ou veña motivado polo interese xeral de certas actuacións para facilitar a instalación de dotacións ou equipamentos que teñan unha especial relevancia ou constitúan un importante impulso para a recuperación económica ou social do ámbito.
2. A declaración dunha ZER implicará a identificación illada ou delimitación dos terreos da área como ámbito de actuación conxunta, segundo proceda, e deberá ir acompañada dunha descrición da solución técnica e da valoración económica de cada un dos inmobles afectados, para proceder a súa rehabilitación.
3. A declaración dunha ZER levará implícita a declaración de utilidade pública e de necesidade de ocupación dos bens e dereitos precisos, incluíndo a imposición das servidumes legais precisas para a súa execución, para os efectos da aplicación pola Administración local ou a autonómica do réxime de expropiación, venda ou substitución forzosa.
4. Nos casos de excepcional interese público ou de inminente necesidade de actuación, e sempre que se trate de actuacións promovidas por órganos das administracións públicas ou de dereito público, incluídos os pertencentes á administración municipal, a declaración dunha ZER determinará a posibilidade de que se poidan executar proxectos de obras que sexan desconformes co planeamento urbanístico de aplicación, a través do procedemento previsto na Lei 3/2016, do 1 de marzo, de medidas en materia de proxectos públicos de urxencia ou de excepcional interese.



XUNTA DE GALICIA

Artigo 57. *Xestión anticipada nas ZER*

Unha vez declarada a ZER a administración pública actuante poderá iniciar anticipadamente a preparación da execución das actuacións previstas.





XUNTA DE GALICIA

Sección 3ª. Plan de dinamización das áreas Rexurbe

Artigo 58. Concepto e obxecto dos plans de dinamización das áreas Rexurbe

1. O plan de dinamización é un instrumento de planificación que, no marco dunha área Rexurbe, formulará un programa plurianual referido á totalidade do ámbito ou a algunhas das súas áreas, integrando actuacións a nivel arquitectónico dirixidas a fomentar políticas de rehabilitación de edificios e vivendas e a mellora do espazo público, con outras a nivel económico e social.

2. Os plans de dinamización teñen como obxecto coordinar as actuacións públicas e privadas destinadas á dinamización e rexeneración destes ámbitos, impulsando a recuperación da actividade económica, fomentando a mellora da habitabilidade das vivendas e das condicións de vida das persoas residentes, procurando atraer novos habitantes e garantindo a conservación dos valores patrimoniais do conxunto e dos seus elementos singulares.



XUNTA DE GALICIA

Artigo 59. *Contido dos plans de dinamización*

1. Os plans de dinamización elaboraranse tomando como base a proposta de actuación presentada para a declaración do ámbito como áreas Rexurbe e conterán, cando menos, as seguintes determinacións:

a) Delimitación do ámbito obxecto da actuación, que poderá ser continuo ou descontinuo, de acordo co establecido na declaración da área.

b) Descrición dos obxectivos que se perseguen na formulación do plan.

c) Análise do ámbito de actuación e diagnose dos problemas existentes que obstaculicen ou impidan a súa rexeneración. Esta análise deberá, como mínimo, abarcar os seguintes aspectos:

1º Estudo da edificación existente no que se terán en conta o estado de conservación das edificacións e as súas condicións de habitabilidade e capacidade ou carencias para acoller usos residenciais; o seu grao de ocupación; usos e actividades; os valores singulares do ámbito no seu conxunto e dos seus elementos singulares merecedores de protección e posta en valor do patrimonio cultural.

2º Estudo das dotacións e equipamentos no que se indiquen os valores e deficiencias existentes e se analicen as posibilidades de incluír novas dotacións co obxectivo de potenciar a renovación e rexeneración do ámbito.

3º Estudo dos espazos libres, de carácter público e privado, así como das características dos servizos urbanísticos existentes e se analicen os déficits que poidan existir.

4º Análise da poboación residente que deberá recoller, como mínimo, os aspectos relativos á idade, ocupación e réxime de tenza das vivendas.

5º Análise das actividades económicas que se desenvolven e das potencialidades que se poidan detectar para xerar novas actividades.

6º Estudo do comercio de proximidade, déficits e carencias.

d) Proposta de intervención, na que se especificarán as medidas que o programa propón adoptar nos campos social, económico e de intervención na edificación e renovación e rexeneración urbanas.




XUNTA DE GALICIA

A proposta de intervención deberá recoller a relación e localización das obras e actuacións integradas no plan e a estimación dos custos das devanditas obras e actuacións.

e) Memoria de viabilidade económica que conterà a formulación do programa de investimentos públicos e privados que prevé o plan. Este programa deberá reflectir os recursos directos e indirectos cos que se pretenda financiar as obras e actuacións incluídas no plan; establecer a orde de prioridades para a súa execución e a programación temporal para a iniciación das obras e actuacións que inclúe. Neste programa de investimentos, o financiamento público deberá prever necesariamente achegas do concello que contribúan a financiar dunha forma significativa as actuacións recollidas no plan. As previsións de achegas de fondos da comunidade autónoma que se inclúan no plan deberán estar amparadas nos diferentes plans ou programas de actuación dos que dispoñan os diferentes departamentos da Xunta de Galicia, para a finalidade prevista en cada unha das accións propostas e poderán estar supeditados á resolución das oportunas convocatorias públicas. O investimento privado deberá incluír, cando menos, a previsión das actuacións a realizar polas persoas particulares como resultado das medidas de fomento adoptadas e os acordos de colaboración que se poidan establecer para actuacións ou medidas singulares.

f) Análise da eventual eficacia das medidas propostas para conseguir os fins establecidos, indicando a coherencia entre as normas e actuacións propostas.






XUNTA DE GALICIA

Artigo 60. *Procedemento de formulación e aprobación dos plans de dinamización*

1. Os plans de dinamización serán formulados polos concellos.
2. A tramitación dos plans de dinamización axustarase ao seguinte procedemento:
 - a) Tras a declaración da área Rexurbe, o concello elaborará o proxecto do plan de dinamización, consonte cos obxectivos, criterios básicos da intervención, proposta das medidas a adoptar e avaliación económica das actuacións públicas e privadas que se prevexan na declaración, indicando o organismo ou organismos encargados do seu financiamento. Así mesmo, cando o documento contemple a posibilidade de que outras administracións participen no financiamento ou na adopción das medidas propostas, deberá acreditarse a dispoñibilidade ou a posibilidade da súa obtención.
 - b) O IGVS será o organismo encargado da tramitación do plan de dinamización. Recibida a documentación correspondente enviada polo concello o citado organismo remitirá o documento aos distintos departamentos da Xunta de Galicia afectados polo plan para a emisión de informe no prazo dun mes. Estes informes deberán pronunciarse sobre a viabilidade técnica ou a posibilidade de financiamento das actuacións que lle corresponden, proporán os programas de actuación ou actividades e formularán, no seu caso, as propostas de modificación ou observacións e alternativas que estimen convenientes. No devandito informe estableceranse as condicións ás que se deberán axustar os programas incluídos no plan de dinamización para garantir a participación do organismo correspondente.
 - c) Recibidos os informes, o IGVS propondrá, no seu caso, ao concello que elaborou o plan as correccións que se deberán introducir no documento. No caso de que non sexan realizadas, o IGVS procederá ao arquivo do expediente.
 - d) Realizadas as correccións, ou no caso de que non foran necesarias, o plan será sometido a aprobación do Consello da Xunta de Galicia, por proposta da consellería competente en materia de vivenda.
 - e) No caso de que o Consello da Xunta de Galicia acorde a aprobación do plan, determinará así mesmo, as consellerías e organismos da Xunta de Galicia que deberán participar nel.
 - f) O acordo publicarase no *Diario Oficial de Galicia* e nas páxinas web do IGVS e do



XUNTA DE GALICIA
concello.






XUNTA DE GALICIA

Artigo 61. *Modificacións e revisións dos plans de dinamización*

As modificacións de carácter substancial e as revisións dos plans de dinamización requirirán a mesma tramitación que a sinalada nos artigos precedentes para a súa aprobación.





XUNTA DE GALICIA

CAPÍTULO IV

Núcleos rurais en estado de abandono

Artigo 62. Declaración de núcleo rural en estado de abandono

1. Os concellos poderán declarar núcleo rural en estado de abandono aos núcleos constituídos pola agrupación de varias edificacións con uso de vivenda xunto co espazo público que as aglutina e lles confire o seu carácter, ou ben estruturados de acordo con algunha das tipoloxías características dos núcleos rurais tradicionais e no que todas, ou a meirande parte das edificacións residenciais están desocupadas e en estado de ruína.

2. Esta declaración terá como finalidade facilitar as actuacións integrais de rehabilitación polo que o concello deberá indagar a identidade das persoas propietarias dos inmobles para os efectos de contar coa súa conformidade para ofertalos para a venda. A declaración non obstará ao necesario cumprimento dos seus deberes legais por parte das persoas propietarias.



XUNTA DE GALICIA

Artigo 63. *Rexistro de núcleos rurais abandonados*

1. Os concellos poderán crear un Rexistro de núcleos rurais en estado de abandono no que se inscribirán, de forma voluntaria, as edificacións residenciais que conforman o núcleo que se declara en estado de abandono.
2. O rexistro será público e accesible coa finalidade de que calquera persoa poida consultalo e obter información dos inmobles incluídos e das determinacións urbanísticas que lles afecten.
3. As persoas propietarias dos inmobles poderán solicitar, en calquera momento, a baixa na inscrición.
4. Os concellos poderán habilitar unha sección neste rexistro para que as persoas propietarias de vivendas abandonadas, que non se atopen incluídas nun núcleo declarado abandonado, soliciten a súa inscrición co fin de incluílas no procedemento de venda establecido no artigo seguinte.



XUNTA DE GALICIA

Artigo 64. *Procedemento de venda*

1. O concello poderá convocar, de oficio ou por solicitude de persoa interesada, un procedemento para a venda de todos ou parte dos inmobles residenciais inscritos no rexistro de forma voluntaria, indicando, cando menos, as seguintes condicións:

- a) Prezo base da oferta do inmovible ou inmobles.
- b) Prazo máximo para a execución da rehabilitación e, no seu caso, das obras de urbanización.
- c) Garantía do cumprimento do deber de rehabilitar.

2. O procedemento consistirá na oferta dos inmobles, podendo as persoas interesadas na adquisición realizar a oferta que consideren oportuna que, en todo caso, deberá ser aceptada pola persoa propietaria. Como resultado do procedemento porase en contacto ás persoas vendedoras e compradoras para que, no seu caso, formalicen a venda.

3. Neste casos, o concello poderá articular medidas específicas de fomento para a rehabilitación destes núcleos.



XUNTA DE GALICIA

Artigo 65. *Difusión a nivel autonómico*

1. O IGVS creará unha plataforma informática a nivel autonómico que porá a disposición dos concellos para que se inclúan os datos dos rexistros municipais co fin de difundir os procedementos públicos de venda dos inmobles incluídos nestes rexistros.
2. O acceso aos datos da plataforma será público coa finalidade de que calquera persoa poida consultalo e obter información dos procedementos incluídos nela.

A handwritten signature in black ink, consisting of a horizontal line at the top and several vertical strokes below it.



XUNTA DE GALICIA

TÍTULO III


Coordinación administrativa para a rehabilitación edificatoria e a rexeneración e renovación urbanas

CAPÍTULO I

Disposición xerais

Artigo 66. Coordinación administrativa

Co fin de garantir a coherencia, a eficiencia e a eficacia das actuacións públicas previstas nesta lei, as diferentes administracións públicas con competencias na materia deberán actuar conxunta e coordinadamente, para facilitar o cumprimento e execución das diferentes actuacións, plans e programas en materia de rehabilitación edificatoria e rexeneración e renovación urbanas, especialmente a través das oficinas de rehabilitación e dos centros Rexurbe.





XUNTA DE GALICIA

CAPÍTULO II

Oficinas de rehabilitación

Artigo 67. Concepto

1. A oficina de rehabilitación é o punto de información, asesoramento, apoio á xestión, seguimento e difusión das ARI para facilitar a execución das actuacións nas citadas áreas.

2. Cada concello deberá contar cunha única oficina de rehabilitación cos medios materiais e persoais adecuados e proporcionados para desenvolver a actividade, que exercerá as súas funcións e competencias na totalidade dos ámbitos do municipio con área de rehabilitación integral declarada ou que se declare.

Os concellos poderán celebrar convenios entre eles para a creación dunha oficina de rehabilitación que xestione conxuntamente a totalidade das áreas de rehabilitación declaradas neses municipios e corresponderalle a xestión aos concellos asinantes.

3. Nas áreas de ámbito municipal a oficina será creada e xestionada polo concello correspondente e nas áreas de ámbito supramunicipal a oficina será creada e xestionada polo IGVS, sen prexuízo da colaboración dos concellos implicados.



XUNTA DE GALICIA

Artigo 68. *Funcións das oficinas de rehabilitación*

1. As oficinas de rehabilitación terán as seguintes funcións:

a) Proponer as medidas necesarias para desenvolver as actuacións derivadas da declaración de ARI, así como o seguimento e control anual da evolución dos indicadores, e, no seu caso, as medidas correctoras ou de impulso que melloren o funcionamento da devandita área.

b) Prestar unha atención directa, persoal e especializada á cidadanía facilitando a información e apoio técnico-xurídico necesario para poder levar a cabo as actuacións de rehabilitación edificatoria e de rexeneración e renovación urbanas.

c) Fomentar a rehabilitación urbana mediante:

1ª. O impulso e xestión de actuacións de rehabilitación edificatoria e de rexeneración e renovación urbanas.

2º. A asistencia técnica e administrativa para a correcta orientación dos expedientes de rehabilitación de edificios, co fin de lograr a maior adecuación posible dos edificios á normativa de accesibilidade, eficiencia enerxética e habitabilidade.

3º. A tramitación, no seu caso, dos expedientes de axudas públicas á rehabilitación de edificios e vivendas e calquera outras asociadas á ARI.


2. As oficinas de rehabilitación poderán asumir aquelas funcións que, sendo competencia do propio concello ou doutras administracións, se acorde que poidan ser desenvolvidas por estas oficinas co fin de simplificar e axilizar a tramitación administrativa e mellorar a atención ao cidadán. En todo caso, estas oficinas deberán contar cos medios humanos e materiais suficientes para asumir estas funcións. Nestes casos, os obxectivos, competencias, regulación, composición e funcionamento das devanditas oficinas concretarase mediante a sinatura do correspondente convenio de colaboración.



XUNTA DE GALICIA

Artigo 69. *Rede de oficinas de rehabilitación*

1. Para mellorar a eficacia e coordinación das diferentes oficinas de rehabilitación, o IGVS, en colaboración cos diferentes concellos, creará unha rede de oficinas de rehabilitación.
2. A través desta rede difundirase o material e apoio para cumprir os obxectivos de cada área, propiciarase o acceso a formación específica en materia de rehabilitación, rexeneración e renovación e implantarase unha Plataforma Informática de Rehabilitación (en diante, PIR) con acceso compartido para todas as oficinas na que se poderán fixar directrices, realizar as consultas, compartir solucións técnicas, dispoñer dun sistema de información xeográfica que facilite programar as actuacións, tramitar as axudas, así como calquera outra información que se considere oportuna.





XUNTA DE GALICIA

CAPÍTULO III

Centros Rexurbe e Comisións de seguimento das áreas Rexurbe

Sección 1ª. Centros Rexurbe

Artigo 70. Concepto


1. O centro Rexurbe é o punto de información, asesoramento, xestión, seguimento e difusión da área Rexurbe, co obxectivo de impulsar as actuacións de recuperación, rexeneración e dinamización da área.
2. Por Orde da consellería competente en materia de vivenda poderán determinarse os estándares mínimos dos medios materiais e humanos así como os criterios, requisitos e solvencia técnica que deban cumprir os centros Rexurbe.



XUNTA DE GALICIA

Artigo 71. *Ámbito de actuación dos centros Rexurbe*

1. En cada concello deberá existir, adscrito á Administración municipal, un único centro Rexurbe que exercerá as súas funcións na totalidade dos ámbitos do municipio con área Rexurbe declaradas ou que se declaren.
2. O ámbito de actuación e competencias do centro Rexurbe poderá estenderse ás edificacións catalogadas existentes no concello, con independencia de que estas non se atopen situadas nalgunha das zonas indicadas anteriormente.
3. Cando nun mesmo ámbito municipal existan diferentes clases de áreas de intervención no medio urbano declaradas pola Administración autonómica, o centro Rexurbe poderá asumir as funcións e competencias previstas nesta lei para as oficinas de rehabilitación.
4. Os centros Rexurbe poderán integrarse na rede de oficinas de rehabilitación prevista no artigo 69.





XUNTA DE GALICIA

Artigo 72. Procedemento de creación dos centros Rexurbe

1. Os centros Rexurbe crearanse polo concello. Por convenio entre o Concello e o IGVS precisaranse os obxectivos, financiamento e o funcionamento destes centros así como os mecanismos de actuación conxunta e coordinada para facilitar o cumprimento e execución das diferentes actuacións, plans e programas en materia de rehabilitación edificatoria e rexeneración e renovación urbanas.
2. Na declaración da área Rexurbe determinarase a composición e os medios persoais mínimos dos que debe dispoñer o devandito centro, nos termos e condicións que, no seu caso, se determinen na normativa prevista no artigo 70.



XUNTA DE GALICIA

Artigo 73. *Financiamento dos centros Rexurbe*

1. O IGVS financiará os centros Rexurbe ata o 60 % dos gastos de persoal do devandito centro. Así mesmo, achegarse unha cantidade igual, como máximo, do 10% da cantidade antes indicada, en concepto de financiamento dos gastos correntes. Este financiamento realizarase sempre nas condicións e cos límites establecidos, no seu caso, na normativa prevista no artigo 70.
2. Esta achega poderase modular en función dos obxectivos alcanzados anualmente no ámbito de actuación.

A handwritten signature in black ink, consisting of a horizontal line at the top and several vertical and diagonal strokes below it.



XUNTA DE GALICIA

Artigo 74. Atribucións de funcións aos centros Rexurbe

1. As Administracións local ou autonómica atribuirán aos centros Rexurbe aquelas funcións que, sendo de competencia das devanditas administracións, se considere conveniente que sexan asumidas por estes centros co fin de simplificar e axilizar a tramitación administrativa e mellorar a atención á cidadanía.

2. No exercicio das súas funcións, os centros Rexurbe procurarán en todo momento a coordinación das súas actuacións coa Administración municipal e cos órganos competentes da Administración autonómica co fin de lograr a maior coherencia e eficiencia nas actuacións que leven a cabo.





XUNTA DE GALICIA

Artigo 75. Funcións dos centros Rexurbe

Os centros Rexurbe deberán asumir, cando menos, as seguintes funcións:

1. A elaboración ou dirección dos estudos que se pretenden realizar para o coñecemento da situación real do parque edificado no seu ámbito de actuación e nas distintas áreas de rexeneración urbana do concello e a actualización destes datos.
2. A análise dos problemas e vulnerabilidades da área ou áreas urbanas que constitúen o seu ámbito de actuación e a proposta das medidas que se deberán adoptar.
3. A prestación dunha atención directa, persoal e especializada á cidadanía, facilitando a información e apoio técnico-xurídico necesario para poder levar a cabo as actuacións de rexeneración e de renovación urbanas.
4. A asistencia técnica, xurídica e administrativa para a correcta orientación dos expedientes de rehabilitación de edificios para lograr a maior adecuación posible dos edificios á normativa de accesibilidade, eficiencia enerxética e habitabilidade e para protexer os elementos construtivos con protección patrimonial.
5. A tramitación e xestión dos distintos programas e expedientes de axudas á rehabilitación de acordo cos plans de impulso á rehabilitación da Administración municipal, autonómica e estatal.
6. O impulso e xestión de medidas e actuacións que atraian o investimento privado facilitando a rehabilitación, rexeneración e renovación urbanas con criterios de eficiencia enerxética, accesibilidade e mellora da imaxe urbana, incluso a través da tramitación de convenios con persoas particulares afectadas, fomentando a dinamización do ámbito e a diversidade de usos e actividades.
7. A elaboración das propostas ou dos informes técnicos relativos á protección do patrimonio cultural en asunción das funcións que poida encomendar a consellería competente en materia do patrimonio cultural.
8. O desenvolvemento do labor de intervención administrativa na edificación e usos do solo



XUNTA DE GALICIA

no seu ámbito de actuación mediante:

- a) A tramitación e o informe das licenzas de obra, autorizacións administrativas que procedan e de ser o caso, a realización das actuacións e trámites oportunos no suposto de obras sometidas ao réxime de intervención municipal de comunicación previa.
 - b) O asesoramento, a resolución de consultas e a proposta de modificacións sobre o plan de desenvolvemento vixente nas áreas.
 - c) A tramitación das declaracións de incumprimento e as ordes de execución, que incluírán a supervisión do estado dos inmobles e, no seu caso, a tramitación dos requirimentos ás persoas propietarias de inmobles para que realicen as obras necesarias para o cumprimento dos deberes de edificación, conservación e rehabilitación
 - d) A tramitación das declaracións de ruínas, analizar o estado das edificacións e propoñer, de ser o caso, a ruína estrutural, funcional ou económica dos inmobles para a súa substitución ou rehabilitación conforme ás previsións urbanísticas.
 - e) O impulso e tramitación dos expedientes de venda forzosa, substitución forzosa ou expropiación forzosa necesarios para levar a cabo as actuacións de rehabilitación edificatoria e de rexeneración e renovación urbanas.
 - f) A elaboración e tramitación de plans especiais que teñan por obxecto a mellora da accesibilidade, para facilitar a instalación de ascensores en edificios de vivendas e a accesibilidade dos espazos urbanos.
10. A proposta das medidas necesarias para a protección do patrimonio cultural.
11. A elaboración das propostas e informes que se someten á Comisión de Seguimento da Área Rexurbe.
12. A elaboración das propostas ou dos informes relativos á mellora da accesibilidade.
13. Calquera outra función que as Administracións local ou autonómica poidan encomendar ao centro Rexurbe para a mellor consecución dos obxectivos fixados.



XUNTA DE GALICIA

Sección 2ª. Comisións de seguimento das áreas Rexurbe

Artigo 76. Comisións de seguimento

1. Crearase unha comisión paritaria de seguimento para cada área Rexurbe co obxectivo de elaborar os plans e programas de actuación nas citadas áreas, coordinar os criterios das funcións doutras administracións atribuídas aos centros Rexurbe e realizar o seguimento e a coordinación dos plans de financiamento para o impulso da rehabilitación, rexeneración e renovación das áreas afectadas.
2. Nas devanditas comisións participarán un mínimo de dúas persoas representantes por cada administración implicada e estarán presididas por unha persoa representante da Administración autonómica.
3. Ás xuntanzas destas comisións poderán asistir as persoas que, sen prestar servizos en ningunha das administracións afectadas, poidan ser propostas por estas en virtude dos seus coñecementos técnicos ou experiencia profesional. Así mesmo, poderán asistir persoas representantes de colexios profesionais, asociacións ou institucións cuxa participación se considere oportuna.



XUNTA DE GALICIA

Artigo 77. Funcións das Comisións de Seguimento

1. A Comisión de Seguimento exercerá as seguintes funcións:

a) Velar polo funcionamento do centro Rexurbe con arranxo a criterios de eficacia e eficiencia que impulsen a consecución dos fins da área Rexurbe.

b) Propor á autoridade competente do concello o nomeamento e cesamento da persoa responsable do centro Rexurbe, e realizar o seguimento e avaliación da a súa actividade .

c) Propor a aceptación das funcións encomendadas ao centro Rexurbe por parte das diferentes administracións públicas.

d) Aprobar os plans e programas de actuación e o investimento previsto anualmente en aplicación do Plan de dinamización.

e) Proponer ás administracións implicadas as modificacións no Plan de dinamización que se considere oportuno realizar para a mellor obtención da finalidade perseguida, aprobando, no seu caso, as modificacións non substanciais na forma e cos límites que se prevexan no indicado Plan.

f) O seguimento, valoración e control da actividade do centro Rexurbe e do cumprimento dos compromisos adoptados, realizando, cando menos, as seguintes actuacións:

1º. Seguimento da evolución dos indicadores fixados no plan de dinamización.

2º. Auditoría anual para comprobar total ou parcialmente o grao de cumprimento dos compromisos, o seguimento dos indicadores e a xestión das accións definidas ao longo do ano polas persoas responsables.



XUNTA DE GALICIA

TÍTULO IV

Financiamento das actuacións de rehabilitación edificatoria e de rexeneración e renovación urbanas

CAPÍTULO I

Das medidas de fomento da rehabilitación edificatoria e da rexeneración e renovación urbanas

Sección 1ª Disposicións xerais

Artigo 78. Programas de financiamento

1. Mediante orde da persoa titular da consellería competente en materia de vivenda poderán aprobarse programas de financiamento para as actuacións de rehabilitación edificatoria e de rexeneración e renovación urbanas previstas nesta lei, así como as bases reguladoras das ditas axudas con suxeición ao previsto na normativa de subvencións.
2. A Xunta de Galicia establecerá programas de axudas que faciliten o cumprimento das obrigas de rehabilitación e conservación previstos nesta lei, así como para fomentar a participación nas actuacións de rehabilitación das persoas propietarias dos inmobles que superen o límite do deber de conservación e estean incluídos nun ámbito previamente delimitado.
3. Os programas de axudas autonómicos serán compatibles con calquera outra axuda pública, sempre e cando a suma de todas elas non supere o custo total da actuación concreta e sempre que a normativa reguladora desas axudas non estableza a incompatibilidade.



XUNTA DE GALICIA

Artigo 79. Acordos para o financiamento das actuacións de rehabilitación edificatoria e de rexeneración e renovación urbanas

O IGVS, para facilitar a xestión e execución das actuacións de rehabilitación edificatoria e de rexeneración e renovación urbanas, poderá asinar os seguintes contratos:

- a) Contrato de cesión de inmobles para a súa rehabilitación polo IGVS, coa facultade de arrendamento ou outorgamento de dereito de explotación a terceiras persoas, por un tempo determinado, transcorrido o cal, o inmovble reverterá á persoa propietaria, podendo establecerse opcións de compra a favor do organismo.
- b) Contrato de permuta ou cesión de terreos ou de parte da edificación suxeita a rehabilitación por determinada edificación futura, ou de venda con pagamento aprazado do prezo do solo e/ou a edificación.
- c) Contrato de arrendamento ou cesión de uso de local, vivenda ou calquera outro elemento dun edificio por prazo determinado a cambio do pago pola persoa arrendataria ou cesionaria de todos ou dalgún dos seguintes conceptos: impostos, taxas, cotas á comunidade ou agrupación de comunidades de propietarios/as ou da cooperativa, gastos de conservación e obras de rehabilitación, rexeneración e renovación urbanas.
- d) Convenio de explotación conxunta ou de parte do inmovble.



XUNTA DE GALICIA

Artigo 80. Convenios para a implantación de programas específicos de financiamento das actuacións

1. O IGVS poderá asinar convenios de colaboración con outras administracións públicas, con outras entidades do sector público autonómico e con fundacións e entidades sen ánimo de lucro, para a implantación conxunta de programas de financiamento das actuacións de reforma, mellora ou rehabilitación de edificios, vivendas e locais.

2. Así mesmo, o IGVS poderá asinar convenios coas entidades financeiras co obxecto de incentivar a concesión de financiamento para as actuacións de rehabilitación.



XUNTA DE GALICIA

Artigo 81. *Axudas para a elaboración e tramitación do planeamento urbanístico*

A Xunta de Galicia fomentará a elaboración e tramitación do planeamento urbanístico necesario para executar as actuacións de rehabilitación edificatoria e de rexeneración e renovación urbanas previstas nesta lei mediante a aprobación de programas de axudas propios ou ben garantindo un acceso preferente destas actuacións nos programas existentes que sexan financiados con fondos propios da Comunidade Autónoma de Galicia.





XUNTA DE GALICIA

Sección 2ª. Fondo de cooperación

Artigo 82. Fondo de cooperación para o apoio ao financiamento de actuacións de rehabilitación e conservación do patrimonio construído en concellos de menos de 50.000 habitantes

1. O Fondo de cooperación para o apoio ao financiamento de actuacións de rehabilitación e conservación do patrimonio construído (en diante, fondo de cooperación) é un fondo sen personalidade xurídica propia, para a xestión do instrumento financeiro de préstamo aos concellos con poboación inferior a cincuenta mil habitantes.

2. Poderán acollerse ao financiamento do fondo os concellos que reúnan o requisito de poboación sinalado no punto 1, co obxecto de financiar, mediante préstamo concedido por resolución da Presidencia do IGVS, as seguintes actuacións:

a) Actuacións promovidas polos concellos no desenvolvemento das competencias que lles atribúe esta lei ou a lexislación urbanística, en relación cos deberes de conservación e rehabilitación.

b) Actuacións de rehabilitación e rexeneración urbanas realizadas polo concello dentro das propias políticas municipais en materia de conservación e recuperación do patrimonio construído.

c) Adquisición de inmobles para a súa posterior rehabilitación.

d) A elaboración de plans especiais de protección,

e) Calquera outra actuación de rehabilitación e rexeneración urbana que se acorde por resolución da Presidencia do IGVS.

3. O fondo dotarase co importe que, previa autorización pola consellería competente en materia de facenda, se estableza por resolución da Presidencia do IGVS.

4. O devandito fondo será xestionado polo IGVS e contará cunha contabilidade separada do ente instrumental, coa que presentará os seus estados orzamentarios e contables de xeito consolidado.



XUNTA DE GALICIA

5. Os recursos asignados ao fondo e os seus rendementos deberán estar vinculados a unha conta operativa propia e separada das do IGVS
6. Mediante orde da consellería competente en materia de Facenda desenvolverase a súa operativa orzamentaria- contable e de rendición de contas. En todo caso estará sometido ao réxime de auditoría, control e rendición de contas que lle resulte aplicable ao IGVS.



XUNTA DE GALICIA

Artigo 83. *Disposición e funcionamento do Fondo de Cooperación para o apoio ao financiamento de actuacións dos concellos na rehabilitación e conservación do patrimonio construído.*

1. A dotación inicial procederá dos depósitos procedentes das fianzas de arrendamento co importe máximo que estableza a Resolución da Presidencia do IGVS á que se refire o artigo anterior
2. As devolucións efectuadas polos concellos pasarán novamente a formar parte do fondo de cooperación para que poida ser reutilizado en novas disposicións por parte dos concellos.
3. Tendo en conta a procedencia e afectación das cantidades que dotan o fondo de cooperación, os concellos non poderán compensar as amortizacións pendentes coas contías que, por calquera outro concepto, puidese deberlles a Administración xeral da Comunidade Autónoma de Galicia ou outras entidades públicas instrumentais pertencentes ao sector público autonómico.
4. As cantidades dispostas e non reintegradas ao IGVS, chegada a data de vencemento parcial ou total do préstamo, consideraranse vencidas, líquidas e esixibles, para os efectos da súa compensación con cargo ao Fondo de Cooperación Local.





XUNTA DE GALICIA

CAPÍTULO II

Das medidas específicas de fomento e financiamento das áreas Rexurbe

Sección 1ª. Programas de financiamento das áreas Rexurbe

Artigo 84. Actuacións protexibles nas áreas Rexurbe

1. Os proxectos de intervención nas áreas Rexurbe poderán recibir financiamento para actuacións nalgúns dos ámbitos seguintes:

- a) Ámbito urbanístico.
- b) Ámbito arquitectónico e de vivenda.
- c) Ámbito económico.
- d) Ámbito social.

2. Son actuacións protexibles nas áreas de rexeneración urbana de interese autonómico as seguintes:

- a) A rehabilitación de edificios e vivendas.
- b) O fomento da accesibilidade e da sustentación do desenvolvemento urbano, especialmente no referente a eficiencia enerxética, o aforro no consumo de auga e a reciclaxe de residuos.
- c) A urbanización ou reurbanización para a mellora das zonas urbanas públicas, da súa accesibilidade e dotación dos espazos libres e equipamentos públicos.
- d) A instalación de redes e servizos, implantación, renovación e mellora das infraestruturas básicas con especial atención ao soterramento das redes de servizos de telefonía e de electricidade, así como a introdución das tecnoloxías da información nos edificios e nos espazos urbanos
- e) O realoxo e retorno das persoas habitantes das áreas Rexurbe.
- f) A implantación de actividades económicas estables así como o acceso a infraestruturas de formación ocupacional e educación permanente para conseguir a inserción laboral de persoas en situación de desemprego.



XUNTA DE GALICIA

- g) O fomento da participación da iniciativa privada na recuperación destes ámbitos con especial incidencia na conservación e potenciación da implantación da pequena empresa de proximidade integrada na trama urbana.
- h) A implantación de programas de fomento do envellecemento activo e a convivencia interxeneracional.
- i) As actuacións de promoción social que beneficien os colectivos desfavorecidos da zona.
- j) Calquera outra medida ou programa que se aprobe polo Consello da Xunta de Galicia.



XUNTA DE GALICIA

Artigo 85. *Medidas de financiamento nas áreas Rexurbe*

1. Ademais das medidas previstas no capítulo anterior, as actuacións nas áreas Rexurbe que contarán con financiamento cualificado poderán consistir en:

- a) Actuacións directas polo IGVS
- b) Financiamento das actuacións de iniciativa privada
- c) Axudas para a adquisición e alugamento de vivendas nas áreas Rexurbe
- d) Medidas de fomento do realoxo e retorno das persoas habitantes das áreas Rexurbe
- e) Programas para implantar plans de promoción do envellecemento activo e da convivencia interxeracional.
- f) Axudas para a rehabilitación de edificios destinados a equipamento de carácter social, cultural ou educativo
- g) Destinar os locais do IGVS para o fomento de iniciativas empresariais, sociais e dinamizadoras do ámbito
- h) Axudas para a instalación de redes e servizos, mellora de espazos públicos e realización de excavacións arqueolóxicas
- i) Bonificacións fiscais
- j) Financiamento mediante o Fondo Rexurbe
- k) Calquera outra que se determine motivadamente pola Presidencia do IGVS ou se aprobe polo Consello da Xunta de Galicia.

2. En todo caso, as actuacións que se realicen dentro dun área Rexurbe terán a consideración de preferentes nos programas financiados con fondos propios da Comunidade Autónoma de Galicia e acceso prioritario aos fondos estatais e europeos no marco dos respectivos programas e sempre que os ditos programas non establezan outras prioridades como requisito de acceso aos ditos fondos.


3. As actuacións nas áreas Rexurbe poderán financiarse cos ingresos derivados da recadación do canon de inmoables declarados en estado de abandono.



XUNTA DE GALICIA

Artigo 86. *Actuacións directas polo IGVS*

1. O IGVS poderá adquirir terreos e/ou edificacións no ámbito das áreas Rexurbe para a súa edificación e/ou rehabilitación directa polo organismo.
2. O IGVS poderá aprobar programas de financiamento polos que o organismo adquira terreos e/ou edificacións no ámbito das áreas Rexurbe e os poña a disposición de empresas promotoras, cooperativas ou persoas particulares para a súa edificación e /ou rehabilitación en réxime de dereito de superficie, cesión, permuta de cousa futura, arrendamento con ou sen opción de compra ou venda. As condicións de acceso e financiamento estableceranse nos respectivos programas.
3. O IGVS poderá tamén concertar con persoas promotoras, públicas ou privadas, a execución das obras de construción e/ou rehabilitación dos inmobles adquiridos para ser destinadas a vivenda de promoción pública concertada.






XUNTA DE GALICIA

Artigo 87. Financiamento das actuacións de iniciativa privada

1. O IGVS aprobará programas de financiamento para fomentar a participación da iniciativa privada no ámbito das áreas Rexurbe, con destino á promoción inmobiliaria, cooperativas de vivendas e outros tipos de aloxamentos.

2. O financiamento poderá consistir en axudas directas á rehabilitación ou edificación, na adquisición ou alugamento dunha parte das vivendas rehabilitadas con destino a vivendas protexidas ou en subvención para que unha porcentaxe das vivendas rehabilitadas sexan destinadas á venda ou alugueiro a prezos taxados. As condicións de acceso, importe, porcentaxes e prezos de adquisición e renda estableceranse nos respectivos programas.





XUNTA DE GALICIA

Artigo 88. Axudas para a adquisición e alugamento de vivendas nas áreas Rexurbe


O IGVS poderá establecer axudas para a adquisición ou alugamento de vivendas previamente rehabilitadas, co obxecto de impulsar as actuacións de rexeneración e renovación urbanas e de facilitar o acceso á vivenda a aquelas persoas que máis o necesitan.



XUNTA DE GALICIA

Artigo 89. Medidas de fomento do realoxo e retorno das persoas habitantes das áreas Rexurbe

1. Para facilitar o realoxo das persoas que habitan nos edificios das área Rexurbe, o IGVS poderá aprobar programas de axudas ao alugueiro para estas persoas.
2. Así mesmo, poderán tamén aprobarse programas destinados a facilitar o retorno das persoas arrendatarias residentes nestas áreas.





XUNTA DE GALICIA

Artigo 90. *Programas para implantar plans de promoción do envellecemento activo e da convivencia interxeracional.*

1. O IGVS poderá aprobar programas que teñan por obxecto a dinamización das áreas Rexurbe, mediante accións dirixidas a implantar plans de promoción do envellecemento activo e da convivencia interxeracional no ámbito.
2. Estes programas poderán consistir en medidas de fomento a través da cesión de uso, do dereito de superficie, compravenda con pago aprazado ou arrendamento dun conxunto de vivendas, xa sexa nun inmovble único ou separadamente en distintos edificios, para a súa rehabilitación. Así mesmo poderán consistir en liñas de axudas ou programas de préstamos a través de entidades financeiras, coa posibilidade de subsidiar os xuros, así como a posta a disposición ou o financiamento do acondicionamento de locais destinados a actividades dirixidas ás persoas maiores e á convivencia interxeracional.



XUNTA DE GALICIA

Artigo 91. *Axudas para a rehabilitación de edificios destinados a equipamento de carácter social, cultural ou educativo*

1. Poderanse establecer axudas para as actuacións relativas á rehabilitación de edificios públicos ou privados con destino a equipamento de carácter social, cultural ou educativo dentro das áreas Rexurbe.
2. Os programas de axudas para a adecuación de edificios de equipamentos terán en conta o emprazamento urbano dentro da área de rexeneración, a súa contribución á mellora da citada área, as características arquitectónicas do edificio para rehabilitar, a coherencia técnica da intervención e a potenciación das actividades que implique o dito equipamento.



XUNTA DE GALICIA

Artigo 92. Xestión de locais do IGVS no ámbito


1. O IGVS apoiará a implantación de actividades dinamizadoras do ámbito nos locais da súa propiedade, con especial atención ao impulso da iniciativa empresarial, o apoio a persoas emprendedoras ou para uso daqueles como viveiros de empresa, así como para proxectos que promovan o desenvolvemento económico e/ou cultural da área.
2. A mesma consideración terán aquelas iniciativas empresariais nas que se acredite a contratación ou a permanencia no seu posto de traballo de mulleres embarazadas, aquelas que garantan a conciliación da vida familiar e laboral e as iniciativas de fomento do emprego e inserción laboral das mulleres, con especial atención ás vítimas de violencia de xénero. As ditas circunstancias teranse en conta como preferentes para a adxudicación.



XUNTA DE GALICIA

Artigo 93. *Axudas para a instalación de redes e servizos*

1. A Xunta de Galicia fomentará a instalación de redes e servizos nas actuacións que se realicen dentro dun área Rexurbe mediante a aprobación de programas de axudas propios ou ben garantindo un acceso preferente destas actuacións nos programas existentes que sexan financiados con fondos propios da Comunidade Autónoma de Galicia ou, no caso de redes ou servizos para os que exista normativa sectorial específica que regule a concesión de axudas á súa instalación, mediante os instrumentos que recolla a dita normativa sectorial.
2. Estas actuacións terán tamén acceso prioritario aos fondos estatais e europeos no marco dos respectivos programas sempre que non establezan outras prioridades como requisito de acceso aos ditos fondos.





XUNTA DE GALICIA

Artigo 94. *Axudas para espazos públicos*

Os programas de axudas nas áreas Rexurbe poderán contemplar tamén axudas específicas para a urbanización, a reurbanización, o acondicionamento e a mellora da accesibilidade nos espazos públicos



XUNTA DE GALICIA

Artigo 95. *Axudas para actuacións arqueolóxicas*

As intervencións de investigación, documentación, protección ou posta en valor do patrimonio arqueolóxico que poidan establecerse como exixencia previa á obtención da licenza para a rehabilitación ou renovación de edificios de vivendas, poderán ser obxecto de axudas ou subvencións nas condicións que se establezan no respectivo programa subvencionador



XUNTA DE GALICIA

Artigo 96. *Bonificacións fiscais municipais e recadación de multas coercitivas*

1. Os concellos, con suxeición á súa normativa reguladora, poderán establecer bonificacións fiscais específicas para fomentar as actuacións de rehabilitación edificatoria e de rexeneración e renovación urbanas previstas nesta lei, así como a ocupación dos inmobles e locais nos ámbitos delimitados.

2. Así mesmo, os concellos nos que se declare un área Rexurbe poderán, con suxeición á súa normativa reguladora, destinar todo ou parte da recadación das multas coercitivas impostas no ámbito declarado Rexurbe para financiar actuacións de rehabilitación e rexeneración urbana nestas áreas.



XUNTA DE GALICIA

Sección 2ª. Fondo Rexurbe

Artigo 97. Fondo Rexurbe para o apoio ao financiamento de proxectos de intervención integral nas áreas Rexurbe.

1. Créase o Fondo Rexurbe para o apoio ao financiamento de proxectos de intervención integral nas áreas Rexurbe como un fondo sen personalidade xurídica propia, para a xestión de instrumentos financeiros de préstamos aos concellos que teñan delimitada a área Rexurbe.
2. Poderán acollerse ao fondo os concellos nos que se delimite un área Rexurbe, co obxecto de financiar, mediante préstamo concedido por resolución da Presidencia do IGVS, a mellora destas áreas dende o punto de vista urbanístico, social, económico e ambiental incluíndo a elaboración do plan de dinamización e os plans urbanísticos para o desenvolvemento da área.
3. O fondo dotarase co importe que, previa autorización pola consellería competente en materia de facenda, se estableza por resolución da Presidencia do IGVS.
4. O devandito fondo será xestionado polo IGVS e contará cunha contabilidade separada da do ente instrumental, coa que presentará os seus estados orzamentarios e contables de xeito consolidado.
5. Os recursos asignados ao fondo e os seus rendementos deberán estar vinculados a unha conta operativa propia e separada das do IGVS
6. Mediante orde da consellería competente en materia de facenda desenvolverase a súa operativa orzamentaria- contable e de rendición de contas. En todo caso estará sometido ao réxime de auditoría, control e rendición de contas que lle resulte aplicable ao IGVS.



XUNTA DE GALICIA

Artigo 98. Disposición e funcionamento do Fondo Rexurbe para o apoio ao financiamento de proxectos de intervención integral nas áreas Rexurbe.

1. A dotación inicial procederá dos depósitos procedentes das fianzas de arrendamento co importe máximo que estableza a Resolución da Presidencia do IGVS a que se refire o artigo anterior.
2. As devolucións efectuadas polos concellos pasarán novamente a formar parte do fondo Rexurbe para que poida ser reutilizado en novas disposicións por parte dos concellos.
3. Tendo en conta a procedencia e afectación das cantidades que dotan o fondo Rexurbe os concellos non poderán compensar as amortizacións pendentes coas contías que, por calquera outro concepto, puidese deberlles a Administración xeral da Comunidade Autónoma de Galicia ou outras entidades públicas instrumentais pertencentes ao sector público autonómico.
4. As cantidades dispostas e non reintegradas ao IGVS, chegada a data de vencemento parcial ou total do préstamo, consideraranse vencidas, líquidas e esixibles, para os efectos da súa compensación con cargo ao Fondo de Cooperación Local.



XUNTA DE GALICIA


CAPÍTULO III

Do canon de inmobles en estado de abandono

Sección 1ª. Disposicións xerais

Artigo 99. Creación, natureza e obxecto do canon de inmobles declarados en estado de abandono

Créase o canon de inmobles declarados en estado de abandono como tributo propio da Comunidade Autónoma de Galicia, con natureza de imposto, de carácter real e finalidade extrafiscal, que somete a gravame aos inmobles declarados en estado de abandono nos ámbitos nos que estea declarada un área Rexurbe.





XUNTA DE GALICIA

Artigo 100. *Finalidade do canon*

O canon de inmobles en estado de abandono ten como finalidade impulsar as actuacións de rehabilitación nas áreas Rexurbe e evitar o estado de abandono das edificacións existentes nestas áreas, reducindo consecuentemente o número de inmobles en estado de abandono.

A handwritten signature in black ink, appearing to be a stylized name, possibly 'M. N.', written on a light-colored background.



XUNTA DE GALICIA

Artigo 101. *Ámbito de aplicación*

O canon de inmoables declarados en estado de abandono aplicarase no ámbito territorial da Comunidade Autónoma de Galicia no que estea declarada un área Rexurbe.


A handwritten signature in black ink, consisting of several loops and a long vertical stroke.



XUNTA DE GALICIA

Artigo 102. *Afectación da recadación*

1. Os ingresos efectivamente obtidos pola recadación deste tributo, deducidos os custos de xestión, destinaranse a financiar as actuacións e medidas de dinamización e protección da área Rexurbe na que se recaden.
2. As leis de orzamentos da Comunidade Autónoma de Galicia poderán establecer os criterios de afectación dos ingresos recadados por este imposto.





XUNTA DE GALICIA

Artigo 103. *Normativa de aplicación*

O canon rexerá polas disposicións desta lei e as normas regulamentarias ditadas no seu desenvolvemento e, no non previsto nelas, polo disposto nas disposicións xerais en materia tributaria.





XUNTA DE GALICIA

Artigo 104. *Inmoble declarado en estado de abandono*

1. Entenderase por inmueble declarado en estado de abandono, aquel ben inmueble que estea en estado ruinoso ou aquel cuxas persoas propietarias desatenderan a súa obriga de conservación e de rehabilitación.

2. O IGVS declarará, por solicitude do concello, a situación de inmueble en estado de abandono cando concorrera calquera das seguintes circunstancias:

- a) Que o inmueble estea declarado en estado de ruína polo concello no que se sitúa.
- b) Que a persoa propietaria do inmueble tivera incumprida unha orde de execución ditada polo concello no que se sitúa.
- c) Que mediara a declaración de incumprimento regulada no Capítulo IV do Título I .

3. A declaración da situación en estado de abandono terá efectos dende a data de notificación á persoa propietaria e ata o momento no que se inicien as obras de rehabilitación ou se produza a transmisión do ben inmueble.

4. Para os efectos do disposto no punto anterior, os concellos nos que exista un área Rexurbe remitirán ao IGVS a solicitude de declaración do inmueble en estado de abandono, xunto coa declaración de ruína, a orde de execución incumprida ou a declaración de incumprimento, no prazo de tres meses a contar dende a data da notificación á persoa propietaria da declaración de ruína ou de incumprimento ou da data na que se produciu o incumprimento da orde de execución.



XUNTA DE GALICIA

Artigo 105. *Censo de inmobles declarados en estado de abandono*

1. O IGVS manterá un censo de inmobles declarados en estado de abandono, que estará a disposición dos órganos aos que se refire o artigo 115 para a xestión deste tributo. O IGVS incluírá, de oficio, no censo os inmobles que se declararan en estado de abandono.

2. Os concellos, no prazo máximo de tres días a contar dende a emisión da solicitude de declaración do inmovible en estado de abandono, remitirán por medios telemáticos ao IGVS os seguintes datos:

- a) Dirección postal do inmovible, referencia catastral e valor catastral.
- b) Identificación da persoa titular que consta no Rexistro da Propiedade e no Catastro.
- c) De ser o caso, data de inicio das obras de rehabilitación.

3. Os concellos serán responsables de comunicar ao IGVS a variación que se produza nestes datos durante a vixencia da declaración do inmovible en estado de abandono.

4. No censo, ademais dos datos reflectidos anteriormente, figurará a causa que motiva a declaración de ben inmovible en estado de abandono, a data da citada declaración e a dos seus efectos, así como a data na que cesen no suposto de que se comunique o inicio das obras ou a transmisión do inmovible.

5 O IGVS dará de baixa os inmobles tras a comunicación e xustificación polo concello das seguintes circunstancias:

- a) O inicio das obras de rehabilitación
- b) A transmisión do inmovible por calquera título xurídico que determine un cambio na súa titularidade.



XUNTA DE GALICIA

Sección 2ª. Elementos do tributo

Artigo 106. Feito impoñible

Constitúe o feito impoñible do canon de inmobles declarados en estado de abandono ter declarado un inmovible en estado de abandono nun área Rexurbe.



XUNTA DE GALICIA

Artigo 107. *Suxeitos pasivos*

1. Son suxeitos pasivos a título de contribuíntes as persoas físicas, xurídicas ou as entidades do artigo 35.4 da Lei 58/2003, de 17 de decembro, xeral tributaria, que sexan propietarias dun inmovible declarado en estado de abandono.
2. Responden solidariamente da cota deste imposto, e en proporción ás súas respectivas participacións, as persoas copartícipes ou cotitulares se figuran inscritos como tales no Catastro Inmobiliario. De non figurar inscritos, a responsabilidade esixirase por partes iguais en todo caso.
3. Os suxeitos pasivos non residentes en territorio español virán obrigados a nomear unha persoa física ou xurídica con domicilio en España para que os represente ante a Administración tributaria da Comunidade Autónoma de Galicia en relación coas súas obrigas por este tributo. O nomeamento deberá comunicarse á Administración tributaria.



XUNTA DE GALICIA

Artigo 108. *Base imponible*

1. Constitúe a base imponible o valor catastral dos bens inmobles en estado de abandono na data de devindicación.
2. Se á data de devindicación do imposto o ben inmovible carecera de valor catastral ou este non se lle notificara á persoa titular, tomarase como base imponible o valor polo que debería computarse para os efectos do imposto de patrimonio.





XUNTA DE GALICIA

Artigo 109. *Tipo de gravame e cota tributaria*

1. O tipo de gravame deste imposto será o resultado de aplicar a porcentaxe do 0'6 % sobre a base imponible en inmobles que teñan declaración de ruína e do 0'4 % sobre o resto.
2. A cota tributaria incrementarase nun 10 % por ano de permanencia na situación de estado de abandono, sen que poida superar dúas veces o importe inicial.

A handwritten signature in black ink, consisting of a horizontal line at the top and several vertical strokes below it.



XUNTA DE GALICIA

Artigo 110. *Exención fiscal*

Estarán exentas do imposto as persoas físicas que acrediten, nas condicións que se establezan nas normas de aplicación do tributo ás que fai referencia o artigo 112, estar en situación de exclusión social, consonte coa lexislación en materia de servizos sociais e inclusión social de Galicia. A exención terá efectos no período impositivo no que se acredite a dita situación pola consellería competente en materia de servizos sociais.

A handwritten signature in black ink, appearing to be a stylized name or set of initials.



XUNTA DE GALICIA

Artigo 111. *Período impositivo e devindicación*

1. O período impositivo coincidirá co ano natural.
2. A devindicación producirase o último día do período impositivo.



XUNTA DE GALICIA

Sección 3ª. Aplicación do canon

Artigo 112. Normas de aplicación

A consellería competente en materia de facenda aprobará as normas de aplicación do tributo.





XUNTA DE GALICIA

Artigo 113. *Xestión do canon*

1. O canon xestionarase a partir da información contida no censo de inmobles declarados en estado de abandono ao que se refire o artigo 106. O censo, que se formará anualmente, conterá a información relativa aos bens inmobles declarados en estado de abandono que estiveran nesta situación o 31 de decembro do ano anterior, separadamente para os de cada clase e será posto á disposición da Administración tributaria no mes de xaneiro de cada ano.
2. A Administración tributaria porá a disposición dos suxeitos pasivos o censo na forma, lugar e prazos que estableza a orde da consellería competente en materia de facenda. A dita exposición ao público comunicarase mediante a inserción de anuncios no *Diario Oficial de Galicia* e na sede electrónica da Administración tributaria e producirá os efectos de notificación colectiva á que se refire o artigo 102.3 da Lei 58/2003, do 17 de decembro, xeral tributaria.
3. A Administración tributaria practicará e notificará a liquidación do canon correspondente ao primeiro ano natural que teña efectos a declaración do inmovible en estado de abandono na forma, lugar e prazos que estableza a orde da consellería competente en materia de facenda.
4. Practicada a primeira liquidación, o canon xestionarase mediante recibo nos anos sucesivos. Os recibos para facer efectiva a débeda tributaria poranse a disposición dos suxeitos pasivos nos prazos, forma e lugar que estableza a orde da consellería competente en materia de facenda.
5. A Administración tributaria poderá acumular as contías do canon correspondentes a cada un dos inmobles que estean declarados en situación de estado de abandono dun mesmo suxeito pasivo nun único recibo.



XUNTA DE GALICIA

Artigo 114. *Prazos, forma e lugar de presentación*


1. As liquidacións ás que se refire o punto 3 do artigo anterior deberán facerse efectivas nos prazos, forma e lugar que estableza a orde da consellería competente en materia de facenda.
2. Os recibos aos que se refire o artigo anterior deberán facerse efectivos nos prazos, forma e lugar que estableza a orde da consellería competente en materia de facenda.
3. Os suxeitos que domicilien o pagamento das liquidacións ou dos recibos poderán optar por facer efectivo o canon de forma fraccionada na forma, lugar e prazos que determine a orde da consellería competente en materia de facenda. Este fraccionamento e aprazamento non precisará de achega e/ou constitución de garantía ningunha nin devindicará xuros de mora.
4. Non será posible aprazar ou fraccionar os pagamentos fraccionados aos que se refire o apartado anterior. A presentación da solicitude non impedirá o inicio do período executivo nin a devindicación das recargas correspondentes e dos xuros de mora, e considerárase incumprimento das obrigas tributarias para todos os efectos. O incumprimento do pagamento de calquera pagamento fraccionado terá os efectos sinalados na normativa xeral tributaria.
5. Tanto a domiciliación como, de ser o caso, o fraccionamento do canon, terán validez por tempo indefinido en tanto non sexan anulados pola persoa interesada, rexeitados pola entidade colaboradora autorizada pola consellería competente en materia de facenda ou a Administración tributaria dispoña expresamente a súa invalidez por razóns xustificadas. Neste último caso, a Administración tributaria notificará aos contribuíntes o acordo de invalidez da domiciliación. Será razón suficiente para que a Administración tributaria declare a invalidez da domiciliación, a non atención pola entidade financeira dos recibos domiciliados e enviados ao cobro, por inexistencia de saldo na conta de domiciliación.



XUNTA DE GALICIA

Artigo 115. *Utilización de tecnoloxías informáticas e electrónicas*

A consellería competente en materia de facenda poderá dispoñer que o cumprimento das obrigas tributarias referidas ao imposto se efectúe mediante os programas informáticos de axuda que, de ser o caso, se aproben.





XUNTA DE GALICIA

Artigo 116. *Liquidacións provisionais*

Os órganos da Administración tributaria poderán ditar a liquidación provisional que proceda de conformidade co disposto na Lei Xeral Tributaria.

A handwritten signature in black ink, consisting of a horizontal line at the top, followed by a loop, and then a vertical line with a small hook at the bottom.



XUNTA DE GALICIA

Artigo 117. *Potestade sancionadora*

1. A potestade sancionadora en materia tributaria exercerase conforme aos principios reguladores dela en materia administrativa e coas especialidades contempladas na Lei Xeral Tributaria, sendo de aplicación as disposicións xerais contidas nela.
2. A clasificación das infraccións e sancións tributarias e o procedemento sancionador tributario rexeranse polo establecido na Lei Xeral Tributaria e demais disposicións que a desenvolvan e complementen.


A handwritten signature in black ink, consisting of a horizontal line at the top and a vertical line below it with some loops.



XUNTA DE GALICIA

Artigo 118. *Revisión*

1. Os actos e actuacións de aplicación deste tributo, así como os actos de imposición de sancións tributarias, serán revisables consonte ás disposicións contidas na Lei Xeral Tributaria.
2. O coñecemento das reclamacións económico-administrativas corresponderá con exclusividade aos órganos económico-administrativos da Comunidade Autónoma, sen prexuízo da vía contencioso-administrativa.





XUNTA DE GALICIA

Artigo 119. *Órganos competentes*

O exercicio das funcións de aplicación e de revisión do imposto así como o exercicio da potestade sancionadora en materia tributaria corresponderán aos órganos ou unidades administrativas competentes da Administración tributaria da consellería competente en materia de facenda que determine a súa norma organizativa.


A handwritten signature in black ink, appearing to be a stylized 'M' or similar character.



XUNTA DE GALICIA

Artigo 120. *Órganos de colaboración*

Sen prexuízo do establecido no artigo anterior, os órganos administrativos competentes na materia de urbanismo, vivenda e servizos sociais auxiliarán aos órganos de aplicación deste tributo e colaborarán con eles, no marco das súas respectivas competencias, para a liquidación, comprobación e investigación do tributo, mediante, entre outras actuacións, a elaboración de informes a petición de estes, a expedición de certificados oficiais dos datos necesarios para a liquidación do tributo, o mantemento do censo a que fai referencia o artigo 105 e/ou a cesión informática dos datos sinalados.





XUNTA DE GALICIA

CAPÍTULO IV

Das medidas de apoio á recuperación de aldeas no rural e dos núcleos rurais en estado de abandono

Artigo 121. Actuacións impulsadas pola Xunta de Galicia

1. A Xunta de Galicia impulsará programas de financiamento ou de actuacións integradas e conxuntas de varios dos seus departamentos para impulsar a recuperación de aldeas no rural e de núcleos rurais en estado de abandono tales como programas de incentivos e promoción turística, ocupacional ou con destino a vivenda libre ou protexida.
2. Así mesmo, fomentarse a recuperación destas aldeas e núcleos por parte das persoas propietarias, concellos ou entidades públicas e privadas, mediante a aprobación de programas de axudas propios ou ben garantindo un acceso preferente destas actuacións nos programas existentes que sexan financiados con fondos propios da Comunidade Autónoma de Galicia.
3. Estas actuacións terán tamén acceso prioritario aos fondos estatais e europeos no marco dos respectivos programas sempre que neles non establezan outras prioridades como requisito de acceso aos ditos fondos.



XUNTA DE GALICIA

Disposición adicional primeira. *Adquisición directa de terreos e/ou edificacións polo IGVS*

1. O IGVS poderá adquirir bens e dereitos por calquera título, podendo concluír calquera contrato, típico ou atípico.
2. O IGVS poderá así mesmo concertar negocios xurídicos que teñan por obxecto a constitución ao seu favor dun dereito á adquisición de bens ou dereitos. Nestes casos, o expediente de gasto tramitarase unicamente polo importe correspondente á prima que, de ser o caso, se establecera para conceder a opción. No momento do exercicio da opción tramitarase o expediente de gasto correspondente á adquisición do ben o dereito.
3. A adquisición terá lugar mediante procedementos que garantan o respecto dos principios de igualdade, publicidade e concorrencia, salvo nos seguintes supostos, en que pode acudirse á adquisición directa sen publicidade:
 - a) Cando así o requiran as peculiaridades dos bens, as necesidades do servizo ou da función que se vai satisfacer, a afectación ou limitacións do mercado inmobiliario na localidade onde estean situados, a urxencia extrema da adquisición ou a importancia ou singularidade do ben para a consecución da recuperación do ámbito a rexenerar.
 - b) Cando a vendedora fose outra administración pública ou, en xeral, calquera persoa xurídica pertencente ao sector público.
 - c) Cando fose declarado deserto o procedemento promovido con publicidade para a adquisición, e sempre que non se modificasen as condicións orixinais do contrato, salvo o prezo e a superficie, que poderán alterarse nun 10%.
 - d) Cando a adquisición se efectuase en virtude do exercicio dun dereito de adquisición preferente.
 - e) Cando se adquira a un copropietario unha cota dun ben, en caso de condominio.
 - f) Cando o valor de taxación do ben o dereito fora inferior a 50.000 euros. Neste caso solicitaranse un mínimo de tres ofertas sempre que as circunstancias o permitan.



XUNTA DE GALICIA

Disposición adicional segunda. *Aplicación das medidas específicas de fomento e financiamento das áreas Rexurbe a outros ámbitos*

As medidas específicas de fomento e financiamento das áreas Rexurbe previstas no capítulo II do título IV, poderán aplicarse a calquera outro ámbito delimitado de renovación e rexeneración urbana ou actuación de rehabilitación edificatoria cando así se acorde pola consellería competente en materia de vivenda nos supostos nos que quede acreditada a urxente necesidade de actuación a través dalgún dos instrumento previstos no citado capítulo, e resulte axustada as dispoñibilidades orzamentarias que estiveran vixentes nese exercicio.



XUNTA DE GALICIA

Disposición transitoria primeira. *Homoxeneización de catálogos de protección*


Para a aplicación do establecido na sección 1ª, do capítulo V do título I, en tanto os concellos non teñan aprobado un catálogo de protección adaptado ás determinacións da Lei 5/2016, do 4 de maio, do patrimonio cultural de Galicia, a homoxeneización dos niveis de protección se realizará mediante resolución da dirección xeral competente en materia de Patrimonio Cultural, por solicitude do concello correspondente.



XUNTA DE GALICIA

Disposición transitoria segunda. *Áreas de rehabilitación declaradas*

1. As áreas de rehabilitación declaradas á data de entrada en vigor desta lei, manterán a súa vixencia para os efectos previstos nesta lei.
2. No suposto de que as ditas áreas cumpran os requisitos para ser declaradas áreas Rexurbe, deberán solicitar a correspondente declaración conforme ao establecido nesta Lei.





XUNTA DE GALICIA

Disposición transitoria terceira. *Oficinas de rehabilitación existentes*

1. As oficinas das áreas de rehabilitación declaradas á data de entrada en vigor desta lei quedarán asimiladas ás oficinas de rehabilitación previstas nesta lei, logo da solicitude do concello.
2. No suposto de que se declare área Rexurbe a un área de rehabilitación integral existente, o concello poderá solicitar que a oficina de rehabilitación existente se declare Centro Rexurbe sempre que cumpran os requisitos previstos no Título III.



XUNTA DE GALICIA

Disposición transitoria cuarta. *Consortio do Casco Vello de Vigo*


En tanto mantéña a súa vixencia o Consorcio do Casco Vello de Vigo poderá asumir, no seu ámbito de actuación, as funcións dun centro Rexurbe, debendo dispoñer dos medios e solvencia técnica que se determinen na normativa prevista no artigo 70.



XUNTA DE GALICIA

Disposición derogatoria

Quedan derogadas cantas disposicións de igual ou inferior rango se opoñan ao disposto nesta Lei.





XUNTA DE GALICIA

Disposición derradeira primeira. *Modificación da Lei 2/2016, do 10 de febreiro, do solo de Galicia*

Uno. Modifícase o artigo 137 da Lei 2/2016, do 10 de febreiro, do solo de Galicia, que queda redactado nos seguintes termos:

“Artigo 137. Rexistro de Soares

1. Os municipios poderán crear un Rexistro de Soares, no que se incluírán os soares e as construcións en ruína ou aquelas sobre as que non se realizasen as obrigas contidas nos artigos anteriores, logo de que se constatase que as medidas de execución forzosa resultan ineficaces para o seu cumprimento.
2. A inscrición no Rexistro de Soares será comunicada pola administración actuante ao rexistro da propiedade.
3. Nos concellos nos que exista Rexistro de Soares será de aplicación o disposto nos artigos 138 e 139 desta lei.”

Dos. Modifícase o punto 4 do artigo 158 da Lei 2/2016, do 10 de febreiro, do solo de Galicia, que queda redactada nos seguintes termos:

“4. Consideraranse infraccións leves as infraccións do ordenamento urbanístico que non teñan o carácter de graves ou moi graves, o incumprimento do deber de cumprimentar en tempo e forma o Informe de Avaliación do Edificio e, en todo caso, a execución de obras ou instalacións realizadas sen licenza, comunicación previa ou orde de execución, cando sexan legalizables por seren conformes co ordenamento urbanístico, así como o incumprimento das ordes de execución ou demolición.

Considérase tamén como leve a infracción consistente na inexactitude, falsidade ou omisión, de carácter non esencial, en calquera dato ou documento que se achega ou consta na comunicación previa.”



XUNTA DE GALICIA

Disposición derradeira segunda. *Modificación da Lei 5/2016, do 4 de maio, do patrimonio cultural de Galicia*

Uno. Modifícase o apartado 3 do artigo 65 que queda coa seguinte redacción:

3 A dita habilitación concretarase, en cada caso, nun convenio de colaboración específico entre o Concello e a consellería competente en materia de patrimonio cultural que recolla, como mínimo, os compromisos de asesoramento autonómico e os recursos técnicos de supervisión e seguimento de carácter municipal, para determinar o alcance da habilitación. Non será necesario este convenio no caso de plans especiais de protección de bens catalogados, polo que os concellos serán competentes para autorizar as intervencións que deles se deriven tras a súa aprobación definitiva, nas condicións establecidas no artigo 58.

Dos. Modifícase o artigo 129 *Infraccións leves* engadindo dous novos supostos:

“y) A realización de calquera intervención nun ben declarado de interese cultural ou catalogado ou no seu contorno de protección ou na súa zona de amortecemento, sen a autorización previa da consellería competente en materia de patrimonio cultural, cando esta sexa preceptiva ou contravindo os termos da autorización concedida.”

“z) A realización de pintadas, incisións e outros actos vandálicos que causen danos ou deterioracións en bens sitos no contorno de protección dun ben declarado de interese cultural ou catalogado.”

Tres. Modifícase o artigo 130 *Infraccións graves* engadindo un novo suposto:

z bis) A realización de pintadas, incisións e outros actos vandálicos que causen danos ou deterioracións nun ben declarado de interese cultural ou catalogado agás que o dano ou deterioración teña a consideración de infracción moi grave conforme ao establecido no artigo 131, sen prexuízo do recollido no apartado a) deste mesmo artigo”.



XUNTA DE GALICIA

Disposición derradeira terceira. *Modificación da Lei 8/2012, do 29 de xuño, de vivenda de Galicia*

Uno. Modifícase o apartado 3 do artigo 33 da Lei 8/2012, do 29 de xuño, de vivenda de Galicia que terá a seguinte redacción:

“3. O importe das fianzas depositadas poderá ser destinado a investimentos para a promoción, construción e rehabilitación de vivendas protexidas de promoción pública, a actuacións directas en núcleos antigos ou suxeitos a un proceso de renovación urbana, á dotación de fondos de cooperación cos concellos para o impulso de actuacións de rehabilitación, rexeneración ou renovación urbana, á medidas de fomento do alugueiro e a políticas de fomento do dereito á vivenda previstas nesta lei, sempre que quede garantida a devolución das fianzas que sexan reclamadas no tempo e na forma que proceda.”

Dos. Modifícase o artigo 96 da Lei 8/2012, do 29 de xuño, de vivenda de Galicia que terá a seguinte redacción:

“Sen prexuízo das axudas e subvencións que se establezan en cada programa específico, as actuacións de rehabilitación, rexeneración ou renovación poderán levarse a cabo directamente polo Instituto Galego da Vivenda e Solo, e as vivendas resultantes poderán ser tanto libres como protexidas.”

Tres. O artigo 100 da Lei 8/2012, do 29 de xuño, de vivenda de Galicia queda sen contido.



XUNTA DE GALICIA

Disposición derradeira cuarta. *Habilitación para a Lei de Orzamentos Xerais da Comunidade Autónoma de Galicia*

A Lei de Orzamentos Xerais da Comunidade Autónoma de Galicia poderá modificar calquera elemento do canon de inmobles en estado de abandono.


A handwritten signature in black ink, consisting of several loops and a long horizontal stroke at the top.



XUNTA DE GALICIA

Disposición derradeira quinta. *Desenvolvemento regulamentario*

Habílase o Consello da Xunta de Galicia para desenvolver regulamentariamente o contido desta lei, autorizándose á consellería competente en materia de facenda para aprobar as disposicións que sexan precisas para a aplicación do canon de inmoables en estado de abandono.






XUNTA DE GALICIA

Disposición derradeira sexta. *Entrada en vigor*

Esta lei entrará en vigor aos vinte días da súa publicación no *Diario Oficial de Galicia* e o canon de inmobles en estado de abandono comezará a exixirse dende o 1 de xaneiro de 2020.




Alfonso Rueda Valenzuela

Vicepresidente e conselleiro de Presidencia,

Administracións Públicas e Xustiza

ESTRUTURA DO BOLETÍN OFICIAL DO PARLAMENTO DE GALICIA

1. PROCEDEMENTOS PARLAMENTARIOS

1.1. PROCEDEMENTOS DE NATUREZA NORMATIVA

1.1.1. NORMAS APROBADAS

1.1.2. PROPOSTAS DE NORMAS

1.2. PROCEDEMENTOS ESPECIAIS DE CARÁCTER INSTITUCIONAL

1.2.1. INVESTIDURA

1.2.2. MOCIÓN DE CENSURA

1.2.3. CUESTIÓN DE CONFIANZA

1.3. PROCEDEMENTOS DE CONTROL E IMPULSO

1.3.1. CONTROL SOBRE AS DISPOSICIÓNS DA XUNTA CON FORZA DE LEI

1.3.2. COMUNICACIÓNS DA XUNTA DE GALICIA

1.3.3. EXAME DE PROGRAMAS E PLANS

1.3.4. ACORDOS, RESOLUCIÓNS OU PROPOSTAS DE COMISIÓNS ESPECIAIS OU DE INVESTIGACIÓN

1.3.5. MOCIÓNS

1.3.6. PROPOSICIÓNS NON DE LEI

1.3.7. OUTRAS PROPOSTAS DE RESOLUCIÓN E ACORDOS

1.3.8. PROCEDEMENTOS DE CONTROL ECONÓMICO E ORZAMENTARIO

1.4. PROCEDEMENTOS DE INFORMACIÓN

1.4.1. INFORMACIÓNS REMITIDAS POLA XUNTA DE GALICIA

1.4.2. SOLICITUDES DE COMPARECENCIA

1.4.3. INTERPELACIÓNS

1.4.4. PREGUNTAS

1.4.5. RESPOSTAS A PREGUNTAS

1.4.6. SOLICITUDES DE DATOS, INFORMES E DOCUMENTOS DE DEPUTADOS E DE COMISIÓNS

1.4.7. RECONVERSIÓNS POR FINALIZACIÓN DO PERÍODO DE SESIÓNS

1.5. PROCEDEMENTOS RELATIVOS A OUTRAS INSTITUCIÓNS E ÓRGANOS

1.6. PROCEDEMENTOS DE ELECCIÓN, DESIGNACIÓN E PROPOSTA DE NOMEAMENTO

1.7. PROCEDEMENTOS RELATIVOS AO DEREITO DE PETICIÓN

2. ELECCIÓN E COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO

2.1. ELECCIÓN DO PARLAMENTO

2.2. COMPOSICIÓN DO PARLAMENTO E DOS SEUS ÓRGANOS

2.3. RÉXIME E GOBERNO INTERIOR


2.4. ORGANIZACIÓN E FUNCIONAMENTO DO PARLAMENTO

3. ADMINISTRACIÓN DO PARLAMENTO DE GALICIA

4. INFORMACIÓNS E CORRECCIÓNS DE ERROS

4.1. INFORMACIÓNS

4.2. CORRECCIÓNS DE ERROS



PARLAMENTO
DE GALICIA

BOLETÍN OFICIAL DO
PARLAMENTO DE GALICIA

Edición e subscricións:

Servizo de Publicacións do Parlamento de Galicia. Hórreo, 63. 15702. Santiago de Compostela.

Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727